

東

華

錄

東華錄

臣周澐潤著恭校

雍正十年壬子春正月辛巳封順承親王錫保子熙良爲世子○

壬午命鄂爾泰爲保和殿大學士兼兵部尙書

由雲貴廣西總督遷

○癸未

甯遠大將軍岳鍾琪奏臣因入冬以來積雪甚深嚴飭卡倫之弁兵止令登城瞭望不許分遣遠哨詎料駐防鏡兒泉副將馬順不遵軍令陽奉陰違擅遣弁兵遠出巡哨致城北山內兵丁突遇賊夷被傷二名衝失一名副將馬順隨遣遊擊楊玉守備張嵩先後帶兵追趕賊夷遠遁其違令之副將馬順理合參奏得旨鏡兒泉卡倫離軍營不及百里駐兵不少賊來卽致傷失兵丁一任遠遁岳鍾琪是何防範且安設卡倫原爲巡探如雪霧黑夜尤宜加意

若止令登城瞭望不許分遣遠哨以爲恐有疏防是必將待賊臨城而後防矣是何軍令岳鍾琪不知自咎僅以副將陽奉陰違爲詞朕實不解將岳鍾琪與該副將等交部嚴察議奏○乙酉禮部題 孝敬皇后冊諡禮成請照例遣官敕諭朝鮮國王得旨上年十一月已訃告該國王今因冊諡禮成又遣官員前往恐外藩不無迎送供應之煩此次不必命使爾部照頒示各省之例一體行文朝鮮將朕此旨傳諭該國王知之○丁亥諭理藩院厄魯特郡王額駙阿寶之子公衮布在西路軍前甚屬效力著加恩封爲固山貝子○裁雲南賓川州賓居巡檢添設景東府猛統巡檢一○戊子諭內閣廣東總督郝玉麟病痊著仍回原任辦事○改江西撫標中軍遊擊缺爲參將武甯鉛山瑞州撫州廣昌鄱湖興國文英永鎮橫岡羊角永豐樟樹南康南湖等營及南昌贛州城守營

守備俱爲都司僉書○改直隸張家口協標左右二營遊擊河間通州大名石匣三屯山永等協中軍守備懷安城西城赤城滴水巖懷來城靖安堡長安嶺樂亭三河采育豐潤張灣寶坻廣平順德杜勝忠順王家坪曹家路密雲城潘家口燕河路懷柔城新雄易水白石口沿河口河屯等營守備及正定府龍固營大名協右營守備各缺俱爲都司僉書

二月己丑朔增廣東香山縣黃梁都巡檢一○庚寅諭內閣我朝撫有方夏 列聖相承惟以愛養黎元爲本 聖祖仁皇帝臨御六十餘年恩施累洽於九州蠲賑動逾乎千萬深仁厚澤浹髓淪肌朕登大寶仰體 皇考仁愛之聖心勤恤閭閻疾苦之民隱宵旰孜孜凡可以厚民生布膏澤者至周且渥歷年以來蠲免賑恤疊沛頻施海內亦旣共知而共見矣惟是任土作貢者治世之常

經勸善懲惡者馭民之大法禹貢以三壤成賦周官以九式經邦
國家經費皆取給於正供聖人恤民之心無窮而取民有制亦不
能頻施逾格之恩以紂國用也至於遊民情農王政所禁奸胥墨
吏國法不容使蠲租免賦而奸黠頑惰之屬皆得濫沐恩膏良善
急公者轉未能均霑惠澤又豈爲政之道哉朕以爲蠲除歷年之
逋賦而使頑戶偏蒙其澤不若減免新歲之額徵而使眾民普受
其惠數年來曉諭中外者屢矣是以清查帶徵錢糧如直隸河南
山東山西浙江等省民間完納者最多朕皆特沛殊恩於該省豐
稔之年將額徵正賦蠲免四十萬兩無非欲將帶徵完納之數仍
散於良善之氓使比戶均被恩施並未收之府庫此亦天下所共
知共見者江南蘇松等處財賦甲於天下而歷年積欠亦較他省
爲最多朕旣豁免康熙五十年以前之未完者其五十一年以後

應徵之項復寬限十年十五年帶徵以紓民力又思此等逋賦實在民欠者固多而官吏侵蝕者正復不少特遣大臣官員等會同撫藩及地方有司逐一徹底清查分晰官侵吏蝕民欠三項以除蒙混之弊又恐承命之員以徵納清釐致滋紛擾悉將帶徵各項停其輸納嚴諭各員實力奉行務使分晰清明毫無疑竇今據侍郎彭維新巡撫尹繼善等奏報清查告竣自康熙五十一年起至雍正四年通計各屬積欠共一千一十一萬六千三百兩零其中侵蝕包攬者共四百七十二萬六千三百兩零實在民欠者五百三十九萬零俱覈對明白無有涸淆朕因江蘇道賦積弊叢生籌畫多年而爲此清查之舉所以經國計清吏治實欲厚民生而除民累也苟有益於羣黎百姓朕卽樂沛浩蕩之恩況朕敬承 皇考寬賦恤民之鴻慈於蘇松額徵浮糧豁免四十五萬積歲計之

其數何啻幾千百萬豈於區區之積逋有所靳惜哉但念官役之侵蝕奸徒之包攬蠹國害民固爲法所不宥而民欠累累亦皆抗玩疲頑之習日積月累以至於斯也今欲槩行豁免不惟墨吏奸胥罔知懲戒且積久欠糧之頑戶無不霑恩被澤自以爲得計而急公之善良不與焉洵非阜民善俗之道也則與其蠲除厯年之逋賦孰若免新歲之額徵爲大有益於斯民乎再四斟酌欲將侵蝕包攬之項分作十年帶徵實在民欠之項更加寬緩分作二十年帶徵嗣後從壬子年爲始本年帶徵之項完納若干朕卽照所完之數蠲免次年額徵之糧若干若官吏百姓等果知悔過急公於每年帶徵額數外多完若干朕卽將次年錢糧照多完之數豁免如此則朕之清釐積欠並無絲毫入官實皆沛爲萬民普被之澤而貪墨奸蠹之徒無所倣倖抗玩疲頑之習知所做惕庶幾吏

治肅清而民風醇厚共成比戶可封之俗矣著該督撫督率地方
官實心奉行其官吏侵蝕之項務於本人名下著追毋得株連以
滋擾累其民欠之項俱按各戶花名完納毋得波及兄弟親戚致
令蠹役借端苛索儻有奉行不善生事擾民者該督撫卽行題參
嚴加議處至侵蝕錢糧之官吏皆應加重罪之人第歷年既久人
數繁多不忍槩行執法治罪著施恩法外寬爲分年帶徵若廢員
中有能悔過自新不拘年限先行完納者應分別准其開復以示
獎勵其依限完納者寬免其罪胥吏中有先期及依限完納者亦
酌量加恩寬免其罪○吏部議准廣西巡撫金鉉奏歸順土知州
岑佐祚緣事革職查無應襲之人請改土爲流設知州一吏目一
駐紮州城舊設州同移駐舊州地方把總移駐隴邦村其頻崗屯
隘上旬榮勞四邦各隘酌設百隊土兵以資防守從之○改廣東

撫標中軍遊擊爲參將○辛卯諭內閣我朝從前文武大臣持躬正直奉職公忠樹績建勳完名全節者朕已降旨於京師賢良祠永遠展祀以彰令範因思外任大臣鎮撫封疆宣猷布化忠勇效命威愛宜民其政績卓然可紀者若於身故之後建立賢良祠俾得永膺祀典旣足慰兵民懿好之公亦足爲後來居官者之勸如近日之將軍蔡良提督張雲總兵蘇大有魏壽國皆素有賢聲勤勞王事而歿於官者允宜在賢良之例著直省各於省會之地建立祠宇其與祀之人卽從近年爲始向後凡有應請入祠者該地方督撫於一人各具一本請旨不必彙奏○召沈廷正來京以王朝恩爲直隸河道總督由刑部左侍郎遷○壬辰以塔林爲吏部右侍郎由額外內閣學士遷○調孫嘉淦爲刑部右侍郎以陳樹萱爲工部左侍郎由大理寺少卿遷○辦理哈密事務員外郎永恒等奏正月二十二日準

噶爾賊突犯哈密貝子額敏擒獲賊人蒙克據供領兵賊人係色布騰策零那木扎爾等由烏魯木齊遣兵六千來攻哈密臣等晝夜守城相機剿賊報聞○癸巳戶部議准升任雲貴廣西總督鄂爾泰奏黔省遵義府屬之正安州見在州治地僻人稀並無城郭其土坪舊治地勢寬闊編氓亦眾請將正安州治移駐土坪又綏陽縣旺草里離縣寫遠接壤土坪請將旺草里改歸正安州轄從之○乙未以性桂署刑部尙書魏廷珍爲漕運總督由禮部尙書遷○丙申以直隸山東河南山西陝西五省少雪命督撫清理刑獄○轉眾佛保爲理藩院左侍郎寶授納延泰理藩院右侍郎○丁酉甯遠大將軍岳鍾琪奏據辦理哈密事務員外郎永恒查斯海副將焦景竑貝子額敏呈稱正月二十二日準噶爾賊兵逼近哈密登城瞭望約三千餘人臣查哈密地方有副將焦景竑帶領官兵一

千五百名駐防又參將韓良弼帶領山西綠旗兵八百名駐紮城內足資固守但賊人既已侵偏哈密自應遣兵截殺臣遣總兵官曹勦等帶兵五千星夜由回落兔大坂五堡地方截其後直至哈密應援總兵官張豹帶兵二千名由闊舍圖嶺赴哈密接應又據永恒等報稱二十三日城池左近賊兵甚少其大隊俱往南湖黃蘆岡向東北沿山一帶前赴塔爾那沁等語臣查塔爾那沁地方有提督顏清如帶兵四千名駐紮城內可以固守又令總兵曹勦等於黃蘆岡一帶相度地勢據其要隘相機掩殺臣更慮賊人或由毛垓圖爾庫爾等路竄入北山逃遁歸巢查北山正西及西北兩路有巴漢恩度爾插漢專津二處俱係賊人必由之路臣更派副將軍石雲倬帶領原任兵部尙書馬會伯率綠旗兵三千二百名前赴巴漢恩度爾一路埋伏署鎮安將軍卓鼐帶領前鋒統

領宗室哈爾吉副都統僧保張正文等率驍勇官兵暨入旗滿兵
共三千八百名前赴插漢專津一路埋伏副將軍常賚帶領都統
良敦總兵官張存孝率滿漢兵三千二百名前赴無克克嶺地方
截殺臣率軍營兵馬見在豫備接應報聞○戊戌大學士鄂爾泰
奏古州丹江等處開闢苗疆一皆懷導 聖訓宣布仁威將士用
命非臣之能況數年以來疊受殊恩異數臣自問百無酬一伏乞
皇上俯鑒愚忱准免議敘得旨覽奏情詞懇切具見誠惓卿忠
勇懋著使苗梗向風不但綏靖苗疆之功績爲人所難能而仔肩
重任之公誠亦大臣中所罕有國家酬庸實功關係鉅典非卿可
以己意遜讓亦非朕可以私心增減者仍遵前旨行○己亥兵部
遵旨議奏升任雲貴廣西總督鄂爾泰貴州巡撫張廣泗辦理苗
疆剿撫允協鄂爾泰應給與一等阿達哈哈番查鄂爾泰見係三

等阿思哈尼哈番應併爲一等精奇尼哈番張廣泗應給與拜他喇布勒哈番得旨大學士鄂爾泰節制雲貴廣西三省歷有歲年於所屬苗疆無不悉心經理使蠻夷等慕義嚮風咸登樂土至於古州等處生苗自昔未經王化鄂爾泰運籌調度剿撫兼施俾苗人懷德畏威抒誠內嚮疆圉開拓邊境輯甯數年以來之功績實非尋常平定苗疆剪除寇賊者可比鄂爾泰著授一等伯爵世襲罔替用獎殊勲餘依議○甯遠大將軍岳鍾琪奏據駐紮塔爾那沁提督顏清如陸續報稱正月二十三日準噶爾賊人占據天生圈山口遣參將米彪帶兵六百名前赴三道大板防範馬廠隨即督兵守城自辰至酉賊人始退西北山下二十四日米彪領兵行至白陽溝一帶與賊對敵賊人退敗隨遣副將陳經綸帶領官兵一千五百名出城禦敵賊人由西南原路而逃陳經綸領兵追逐

沿途接剿等語臣查賊人率眾長驅深入塔爾那沁一帶原圖擄掠牲畜今軍營所留馬匹羸頭俱在山西四道溝畢留大坂內牧放官兵防護嚴密牲畜並無傷損報聞○庚子諭內閣國家典禮首重祭祀每當齋戒日期必檢束身心竭誠致敬不稍放逸始可以嚴昭事而格神明朕每遇齋戒之日至誠至敬不但殿廷供設銅人卽坐卧之次亦書齋戒牌存心儆惕須臾弗忘至內外大小官員雖設齋牌於官署但恐言動起居之際稍有褻慢卽非致齋嚴肅之義查明代祀典凡陪祀及執事之人有懸祀牌之例今酌定齋牌之式令陪祀人員佩著心胸之間使觸目儆心恪恭罔懈並得彼此觀瞻益加省惕其於明禋大典愈昭虔潔著傳諭各部院及八旗並直省文武官員一體遵行○甯遠大將軍岳鍾琪奏臣合總兵官曹勦統領副將紀成斌率兵應援哈密於正月二十

七日將至二堡地方正遇賊人大隊約有五千餘人卽奮勇進擊交戰一晝夜二十八日賊眾登山抗拒曹勦等復四面奮攻爭先力戰從卯至午賊眾大潰殺傷無數奪其馬匹牛羊並救出兵丁及漢回商民數百名所餘賊兵由沙磧敗遁西逃曹勦領兵搜捕直抵二堡下營二十九日曹勦自二堡行至柳樹泉總兵官張豹協同哈密副將焦景鉉塔爾沁副將陳經綸等與曹勦合兵一處乘夜追剿臣思賊人腹背受敵縱有殘寇免脫勢必逃至無克克嶺臣隨知會副將軍石雲倬常賚署鎮安將軍卓鼐等派遣滿漢兵丁六千名於無克克嶺南山口之梯子泉一帶截殺仍著總兵官曹勦將所領官兵在沙棗泉駐紮以張聲勢所有大捷緣由理合繕摺奏報得旨大將軍岳鍾琪奏報各路撥派官兵進剿堵截及總兵曹勦等擊敗賊人之信調度有方運籌亦備官弁兵丁

奮勇效力擊敗賊眾朕心嘉慰惟是曹勦領兵一路正當賊鋒其所帶兵丁稍覺單弱而勇健將弁亦覺尙少再賊人若由無克克嶺逃遁則有常賚石雲倬等堵邀擊殺假若敗殘餘賊由沙磧而遁必由齊克塔木經過吐魯番之官兵早能得信與回民併力邀擊豈不更善又穆壘駐兵一事朕已降旨與岳鍾琪令其計議舉行則吐魯番回民遷移之事可以緩商至穆壘築城若事在必行以速爲善今賊夷受創而去乘機動工更覺順便並令岳鍾琪速議奏聞○癸卯大學士等議覆直隸古北口提督路振揚等奏直隸獨石口參將請改爲副將增都司一千總二把總三馬營堡把總改爲千總再添撥千總一龍門路城都司改爲遊擊趙州堡把總改爲守備張家口路屬柴溝堡增參將一把總一其應添兵丁請於宣化鎮兵內抽出四百三十名再召募四百名以敷防守至

於山西沿邊各營路將領應行增添新平路助馬路俱增千總把總各一將軍會堡增千總一馬市水口改原設外委把總爲千總平魯路增把總三得勝路增把總二鎮宏堡鎮邊堡宏賜堡鎮羌堡拒門堡保安堡鐵山堡威虎堡迎恩堡焦尾城增把總各一其應添兵丁俱於大同鎮殺虎協朔平城守營內抽撥足額無庸另募所有直隸山西一帶邊牆俱無庸修築其坍塌各口應用木柵鹿柵堵塞從之○丙午大學士等議奏陳泰世受國恩身爲參贊傅爾丹統兵進剿之時特授伊兵二千令在科布多河岸駐紮以備賊兵乃陳泰一聞索倫逃兵訛言卽畏懦不前領兵回向扎布韓後傅爾丹屢次催調陳泰惟事推諉又不卽赴科布多殊干法紀應照律擬斬秋後處決行文軍營令將陳泰解送來京交刑部監候得旨陳泰之罪斷無可赦著照擬處斬卽在軍營監禁至秋

審時擬爲情實具奏俟命下之日再行正法○丁未李蘭緣

調以王紘爲江西布政使孫詔爲安徽按察使由光祿寺○姜穎

新患病解任以寶啟瑛爲直隸按察使由光祿寺○戊申裁山西

吳城青城二驛驛丞各一○辛亥甯遠大將軍岳鍾琪奏準噶爾

賊由五堡之南沿沙磧敗遁若尋有水草路必繞至無克克嶺一

路西竄臣前派副將軍常賚石雲倬所領之官兵六千餘名俱於

正月二十九日午未時已齊至無克克嶺臣與副將軍常賚議官

兵一到無克克嶺略爲歇息卽令石雲倬挑帶四五千名先赴梯

子泉一路截殺署鎮安將軍卓鼐帶滿兵三千名接應其餘官兵

令常賚帶領守截無克克嶺山口三十日午後賊人適在山口二

十里屯住石雲倬等如卽遣發官兵乘夜潛襲滅此自不待朝食

詎料初一初二等日查無捷音至初三日始據卓鼐咨稱初一日

賊兵業已逃竄初二日卽遣驍勇兵近接遠捕賊人從陶賴大坂之西越向納庫山遁歸臣思將軍三員帶兵萬餘觀望不前以致賊人驚覺遠颺深爲駭異及副將軍等陸續撤兵回營詢其情節據常賚卓爾同稱三十日午後見有賊人屯住山口石雲倬總不發兵直至戌時始派兵一千五百名令總兵官張存孝帶領在山下等候又數次遣人攔阻不許前進石雲倬安寢帳房初一日天明始領兵東行十餘里隨卽安營造飯煎茶繼轉西而行張存孝至賊人屯住之處餘火未息報稱賊人竄遁不遠請其速行前進追剿石雲倬又傳令撤兵不許追襲臣以梯子泉一帶實逆賊歸巢之要路又慮無克克嶺之西南尙有塔庫納一路亦係賊人歸途務須派兵堵截查有涼州右營外委馬得玉乃熟識塔庫納庫道路之人令其馳赴行營聽候發兵領路不料石雲倬大怒以馬

得玉爲多事欲行責治並不發兵邀截賊人果由塔庫納庫一路
逃歸坐失機會石雲倬乖戾僨事臣實難代爲隱諱不得不據實
奏聞得旨辦理軍機大臣嚴察議奏尋議石雲倬應革職交與岳
鍾琪同常賚卓鼐等詢明確供解京按律究擬從之○壬子諭大
學士等據大將軍岳鍾琪奏報賊人從塔庫納庫一路遁逃並撤
兵回營各情由此次賊夷狂肆昏亂深入重地投身羅網乃自速
滅亡也我師旣以逸待勞且我眾彼寡但能申明軍紀要截擊殺
並不必奇謀異算斷不至免脫狼奔今乃坐失機會不但不能屠
剿且使賊人由坦途而遁此實朕與廷臣意料所不及者其領兵
之石雲倬已降旨治罪至岳鍾琪素諳軍旅本非庸材緣懷游移
之見致乖戰守之宜前車之鑒非止一端嗣後當深悟前非痛自
省惕先事綢繆臨事堅定壹號令以振軍聲示威信以齊眾志庶

可以奏膚功而收後效朕猶深望之○癸丑諭大學士等前議三四月間穆壘築城駐兵一事已降旨大將軍岳鍾琪令其酌量辦理今再四思維以數萬官兵移駐穆壘春間馬駝既恐膺力不足且時日稍覺忙迫未必事事皆能就緒不若遲至六月夏秋之交將諸事豫行慎密辦妥大兵進發一舉可成將來豫備兵丁之時須出其不意速完城工則戰守皆易矣穆壘駐兵之舉既緩則吐魯番之兵糧當急爲籌畫吐魯番既有官兵二千名若再加三千名則軍勢益壯不但可以保護回民卽將來禾稼在野之時賊人前來踐踏我師合回眾擒剿之亦易爲力此時發兵三千前往就便可以將米糧運送或由沙磧小路零星運往亦可儻僱哈密之人運送而令吐魯番之人接應皆照數給與腳價著岳鍾琪悉心妥議辦理○諭西路副將軍石雲倬已革職議罪朕欲於各省督

撫提鎮中簡用一人前往軍營協辦軍務貴州巡撫張廣泗才幹
優長實心任事數年以來苗地用兵該撫親歷戎行深諳軍務著
卽馳驛來京面請訓旨前往軍營爲副將軍賞藩庫銀一萬兩製
辦行裝貴州巡撫印務著廣西布政使元展成前往署理廣西布
政使印務著廣西按察使張鉞署理廣西按察使印務著廣西慶
遠府知府徐嘉賓署理○命劉世明往西路參贊軍務以郝玉麟
署福建總督鄂彌達署廣東總督楊永斌署廣東巡撫甘汝來署
廣東布政使

由江南蘇松
常鎮道署

○甲寅移江南淮徐道駐宿遷縣

三月己未裁雲南磨者井烏得井鹽大使添設白石谷井復隆井

鹽大使二改琅鹽井吏目爲大使○癸亥 上親耕藉田○甲子

以常賚爲內大臣仍留軍營托時爲刑部右侍郎

原任倉場侍郎

○乙丑

諭內閣直省各府州縣設立壇墠致祭 社稷及風雲雷雨山川

城隍之神每歲春秋展祀以崇報享典至重也從前初建之時有司或視爲具文規制未必周備及厯年旣久漸有傾圯之處又未必及時修葺是以僻遠之郡縣規模簡略禮儀草率者往往有之甚非肅將禋祀之本意也著禮部查照定例行文各該督撫轉飭府州縣敬謹如式修理以重祀典仍令造冊報部每遇該管官員升遷事故俱照先農壇忠孝節義祠例入交盤項內查明接受則有司自顧考成經理益加虔恪矣○添設山西平定州甘桃鋪驛丞一○丙寅改陝西慶陽靖邊西鳳潼關波羅神木定邊漢中永昌中衛花馬池河州洮岷永固等協中軍守備及沙州協左右營鳳翔城守營邠州營盤屋營富平營金鎖關營七里關營綏德營鄜州營文縣營碾伯營響水堡懷遠堡常樂堡雙山堡建安堡高家堡鎮羌堡安邊堡鎮靖堡新城堡張義堡蔡旗堡安遠堡三眼

井堡橫城堡威遠營清水堡梨園堡馬營墩堡硤口堡孤山堡大壩堡保安堡歸德堡黃墩堡踏實堡赤金營柳溝營岔口營岷州營舊洮堡西固堡南川營守備俱爲都司僉書○戊辰甯遠大將軍岳鍾琪奏據擒獲準噶爾賊巴顏等供領兵來犯哈密係台吉色布騰及小策零敦多卜之子策零那木扎爾等噶爾丹策零去年九月內調兵六千名在烏魯木齊地方會齊至奇台附近處過冬今年正月十二日由奇台起程於二十日夜過無克克嶺前赴哈密其侵犯阿爾泰之兵去年十一月間小策零敦多卜回至哈喇沙爾大策零敦多卜回至塔爾巴哈台留小策零敦多卜之子曼濟在撥東濟地方過冬今因哈薩克兵擄掠準噶爾七百餘戶噶爾丹策零已將曼濟撤回欲往哈薩克地方發兵報聞○改江南安康撫標中軍遊擊蘇州城守營遊擊壽春協安慶協河標督

漕標京口將軍標等中軍守備缺及廬州亳州溧陽平望泰興掘港楊舍孟河黃浦柘林青村南匯東海蕭營小關子窈子港等營守備俱爲都司僉書○丁丑大學士等參奏據甯遠大將軍岳鍾琪奏報賊人敗遁及臺站牧廠情形諸摺情詞互異前後舛謬岳鍾琪以無克克嶺爲賊遁歸必由之路其梯子泉地方恐賊鋌而走險之道則當派撥兵丁時卽應指定兩處酌遣官兵邀截而必俟已至無克克嶺始令往梯子泉並令石雲倬等略爲歇息是賊人之得從塔庫納庫潛逃而歸者雖石雲倬之罪而岳鍾琪亦難辭咎也又前奏塔爾沁各廠看守甚嚴賊人一無所得後又奏報失去牲畜並各廠弁兵亦有損傷且云截殺賊人收回羊馬所得足償所失覩然不以爲恥殊非大臣奏對之體又無克克嶺離軍營僅九十里賊兵過嶺而軍營茫然不知所設坐卡兵丁此時

何在且鏡兒泉接濟察罕哈麻爾復設三大卡倫專爲探信而設
乃一無聞見則平日所云傳遞號礮頃刻可至者尙足恃乎當草
枯馬瘦之時賊以五六千人入我卡倫越過軍營直至塔爾那沁
我兵三萬餘眾周圍密布旣任其來復任其去賊並不奔沙磧竟
由小路而去似此玩忽縱賊奏報不實深負 聖恩有玷倚任請
將岳鍾琪敕部嚴加議處得旨該部嚴察議奏○戊寅諭內閣向
因武員養廉不敷以致扣剋兵餉是以酌定親丁名糧以爲養贍
家口之費又因營伍公用無資定有額兵百名准抽二名之例似
此曲加體恤無非施恩於弁員使應有之兵數再無虛冒以收戎
行之實效也近聞各省中尙有數處不能全除空糧之弊或於親
丁名糧之外仍有家人長隨頂名支領者又有字識匠作之輩賄
求濫充而勇力之人轉不得入選每遇調撥差用則委靡退縮不

耐勞苦前歲湖廣提標曾以兵丁二百名調補鎮竿四營其中逃避者卽已過半又加援剿黔苗時提標兵丁往來鎮竿六里等處跋前疐後行役維艱國家歲費帑金養一兵期獲一兵之用若實存之名數既有空虛而在伍之兵丁又復怯懦不振則所謂武備修明者安在乎著該管大臣用心稽查勤加訓練務將陋規永革諸弊悉除毋得溺於積習苟且因循負朕委用儻屢經訓飭之後有不知悛改者定加嚴譴○兵部議准升任雲貴廣西總督鄂爾泰奏黔楚交界之生苗久居化外今銅仁所屬坡東坡西向化歸誠者一百五十一寨均宜設協安營移兵駐紮請於銅仁協添兵八百名大定協添兵五百名遵義協添兵一百八十八名鎮遠營添兵一百名令原設將弁帶領分防松桃水城等處裁去施南營參將一留守備一與所轄之石阡營俱歸鎮遠營轄移正大營同

知駐紮松桃大定府通判駐紮水城從之○己卯封喀喇沁塔布
囊厄爾德尼爲輔國公○庚辰裁雲南曲靖府通判增元江府通
判一駐他郎南安州州判一駐碣嘉姚州州判一駐普洱改臨安
府原轄之新平縣歸元江府轄普洱鎮原轄之元江營歸臨安鎮
轄其元普沅威鎮改爲普洱沅威鎮臨安澂江鎮改爲臨元澂江
鎮移元江營守備駐他郎○丁亥諭辦理軍機大臣等朕覽大將
軍岳鍾琪陸續奏摺知官兵騎赴軍營之馬及塔爾那沁等處收
放之馬有沿途疲瘦倒斃者有傳染時疫者有被賊人劫奪者見
今存賸馬匹寥寥無幾夫以多年購買豫備之馬匹而棄之有如
草芥其咎將誰歸乎又據岳鍾琪奏稱穆壘駐兵俟所調駝馬到
營之日卽速起程等語口內解送之馬遠涉長途不令休息卽欲
驅使前赴穆壘其力實有不能目今口內駝馬陸續解送軍營賊

人探知必又生窺伺之念且將來移駐穆壘之後所有駝馬牲畜甚多如何牧放布置以防偷盜岳鍾琪須悉心籌算思患豫防毋得仍蹈前轍再者朕聞軍營中自大將軍以至將弁皆用兵丁之力伐木取土蓋造房屋兵丁等雖勉供使令而退有怨言夫兵丁身列戎行枕戈荷戟冒敵衝鋒是其職業至於興作力役非其事也是以從前築城時凡兵丁之情願傭工者朕皆照數給與工價而不忍輕用其力將弁欲蓋造房舍自當捐己貲以雇夫役豈可圖一身之便安而不恤兵丁之勞苦使伊等操練辦公之外復竭蹶以供其私役乎從來爲將帥者與士卒同甘苦然後可以得其歡心而鼓其銳氣今軍營之行事如此豈不與古人領兵之道相左乎將來移駐穆壘時儻有復蹈前轍者經朕訪聞必嚴加治罪

○是月免山東濱州新城等八州縣雍正九年水災額賦有差

夏四月戊子朔諭果親王等圓明園官兵應廣其升遷之路增補官員其如何增補之處著議奏尋議圓明園原設每旗營總各一員副護軍參領各二員護軍校委署參領各四員護軍校各十員副護軍校各九員今請於八旗見有之副護軍參領內每旗揀選一員補授護軍參領隨營總辦事向例副護軍參領係五品今請准爲四品其護軍校委署參領請准爲五品每旗增補護軍校四員副護軍校五員又內府三旗護軍參領共三員今增補營總一員亦請准爲四品令掌管關防再隨關防之筆帖式每旗選補四名內府三旗亦各令選補四名從之○辛卯兵部等衙門議准升任雲貴廣西總督鄂爾泰奏都江河道開通地方遼闊宜添設文武官員分防彈壓上江請置一協設副將一遊擊二守備二千總四把總八兵二千二百名分爲左右營下江置一營設遊擊一守

備一千總二把總四兵八百名九股適中之台拱置一營設參將一守備二千總二把總四兵一千名分爲左右軍其古州鎮原議駐城兵三千名內撥五百名分布各汛清江協分防柳羅之兵四百名內抽出二百名以一百名防守大營後山一百名添駐公鵝城內至黃施營原設遊擊一千總一把總二應裁兵五百名撥歸台拱營新設兵丁之內仍令分駐舊施秉橐貢二處所餘黃施守備一千總一把總二兵二百名卽改爲專營以上各協營俱歸古州鎮統轄再於都勻府設理苗通判一駐紮上江永從開泰天柱等縣增縣丞三分駐下江古州清江等處又廣西慶遠府屬之荔波縣離府治五百餘里山路險遠請改隸貴州都勻府轄得旨朕與大學士鄂爾泰面加商酌新疆遼闊直通楚粵兼有內地舊汛非古州一鎮所能統轄查都江清水二江地界形勢兩路劃然牽

合歸一終難控馭而古州鎮處都江之適中清江協處清水江之適中遙對雄峙各踞要區若於清江協裁去副將改設一鎮並於九股亦裁去參將改設遊擊將新疆之丹江營台拱營與內地之銅仁鎮遠黃施天柱石阡平越等協營俱歸管轄其餘都勻協黎平營並新設之上江下江諸協營仍隸古州鎮管轄則弁兵原止如舊俸餉亦不須增添於數千里苗疆可無鞭長不及之慮更屬妥協著將清江協改鎮以雲南永北總兵官趙文英調補餘依議○孫蘭芬緣事革職調徐聚倫爲山東布政使以鄭禪寶爲河南布政使

由御史遷

○辛丑工部議准升任雲貴廣西總督鄂爾泰奏滇

省水利全在昆明海口見經修濬膏腴田地漸次涸出至如盤龍江金陵銀陵寶象海源馬料明通馬溺白沙等河俱與海口相近宜建閘築壩合雲南府水利同知巡查並請於昆陽州增水利州

同一駐紮海口以專責成再通省有水利之處凡同知通判州同

州判經歷吏目縣丞典史等請加水利職銜以資分辦從之○壬

寅召樓儼來京以李蘭爲江西按察使

降調江西布政使

○癸卯解潘體

豐任以劉藩長爲福建布政使李玉鉉爲福建按察使

原任福建按察使

○予故戶部尙書德明祭葬諡端勤贈太子少保○乙巳調海壽

爲戶部尙書實授性桂刑部尙書○兵部遵旨議覆大學士鄂爾

泰等參奏岳鍾琪玩忽縱賊奏報不實應行議處查岳鍾琪身爲

大將軍專制邊疆賊夷以五六千人從無克克嶺入我卡倫侵犯

哈密岳鍾琪茫然不知令賊劫掠牲畜從塔庫納庫綏騎遁歸岳

鍾琪智不能料敵於平時勇不能殲敵於臨事律之軍法百喙難

辭應削去公爵並革去宮保世職暨總督職銜仍令暫護大將軍

印務以圖後效得旨岳鍾琪削去公爵並革去宮保降爲三等侯

仍留總督職銜護大將軍印務戴罪立功○予故原任吏部右侍郎加左都御史銜王沛懽祭葬○丙午諭辦理軍機大臣等阿齊圖受朕殊恩用至大臣並不感恩報效輒將交辦事件任意推諉及至差往之處又將並未交辦之事矢口言論私出怨言沿途復向地方官勒索餽送騷擾驛站卑鄙不堪阿齊圖著革職前往博第巴爾米忒操練兵丁之烏爾輝地方效力贖罪行走○調張大有爲禮部尙書以范時繹爲工部尙書由都統遷○移安徽宿州州同駐徐溪口○壬子賑永吉州被火災民○甲寅諭果親王允禮等近見圓明園兵丁氣象較前甚優圓明園之八旗及內府三旗著賞給教習人員令伊等子弟學習漢書其一切事宜著定議具奏尋議設立學舍當視營房之遠近鑲黃正黃正白鑲白四旗營房相近請設學舍一所教習二名正紅鑲紅二旗營房相近設學舍

一所教習一名正藍鑲藍二旗營房隔遠內務府三旗原同一營設學舍三所教習三名其教習人員在入旗及內府生員內選取給與錢糧季米四年一換訓誨優者咨行吏部卽以筆帖式用劣者革退另行選補從之○乙卯工部議升任雲貴廣西總督鄂爾泰奏全滇水利事宜一嵩明州陽林海疏深河道水勢暢流周圍草塘均可招民開墾一宜良縣共開河五道其四道俱經引水灌田惟江頭村所開舊河地形稍高應自胡家營北接舊河另開一道以資灌溉一尋甸州尋川河中有整石四十餘丈難以開鑿應另濬沙河十五里俾得暢流一東川府城北漫海一區地本肥饒因積水棄置今開河建閘水消田出亦可招民承墾一浪穹縣羽河等處築隄四十餘丈俱補苴一時急宜委勘加修一臨安等屬應築工程暨通粵河道嵩明州河口俱請委員查勘及時興工務

期深通堅固以垂永久從之○改直隸秦甯營守備爲中軍都司兼管左營○是月免直隸赤城縣雍正九年電災額賦有差

五月丁巳朔以山東濟南等府少雨命截南漕米四十萬石備糶○戊午勵廷儀病假以彭維新暫署刑部尙書○調徐聚倫爲河南布政使鄭禪寶爲山東布政使○辛酉以京師少雨命清理刑獄○壬戌吏部議覆山西按察使溫而遜奏江南素稱澤國河湖交通臣歷任江南見丹陽至鎮江口數十里河身稍窄糧艘往來常致擠塞雖見在疏通恐數十年後復至淤淺各府州縣有兼司水利之名而無講求水利之實太湖新設同知分管水利亦未能料理妥協請於蘇松常鎮四府太倉一州五處適中之地設一道員專司河湖水利俾其巡歷上下審量情形整修器具隨宜調度庶責成專而收效遠其原設太湖同知可裁從之○癸亥諭入旗

都統等八旗借支公庫及廣善庫銀兩數十年來拖欠未完者尙有四十餘萬當時原因旗人每遇急需卽向人那貸以至每年所得俸餉不足補償愈至窘乏於是特設公庫廣善庫以周其不足而伊等罔知感恩任意花費至有僞捏事端一人名下多至三四千金者國家庫帑百姓脂膏豈容恣其虛誑盜竊濫用情甚可惡是以其人雖故亦於其子孫弟姪及家下披甲人等俸祿錢糧坐扣一半俾人知祖父欠帑日後爲子孫之累庶冒領侵蝕之風可以少息但八旗官兵賴俸祿錢糧應差欠帑人數眾多儻生計艱難未免有誤公事著將八旗借欠公庫廣善庫案內人員本身已故將伊子孫等坐扣一半俸餉抵補伊祖父舊欠者開恩豁免以降旨之日爲始照舊賞給此朕格外之恩後不爲例其餘虧空侵蝕那移婪贓等項仍遵前旨分別查奏○甲子諭大學士等趙之

垣著來京張體義著給與按察使銜前往肅州與副將馬龍一同辦理運糧事務○戊辰諭辦理軍機大臣等護軍統領阿思海著授爲前鋒統領令往西路軍營管轄滿洲兵行走侍郎武格至巴爾庫爾時著給與揚武將軍印統轄巴爾庫爾滿洲兵伊禮布在參贊內行走協同武格辦事總督劉世明著授爲副將軍統轄巴爾庫爾綠旗兵與武格馬會伯商酌辦理事務○江甯織造內務府郎中許夢閔奏原任江甯織造綏赫德已將司庫八十五筆帖式巴圖借用銀兩代爲賠補應免重追得旨向來織造官員往往爲司庫筆帖式所愚弄恣意妄行侵盜國帑及至事發總恃有織造代賠置身事外積弊若此斷不可不加懲戒江甯織造綏赫德離任時大有虧空朕特降旨令接任許夢閔徹底清查以清弊蠹乃許夢閔以司庫等借用之項稱爲綏赫德已經代賠無庸重追

獨不思綏赫德管理織造關稅兩項其代賠之銀卽係兩項贏餘均爲國帑安得不覈實歸公而乃私取以償屬員侵盜之項乎許夢閣瞻徇情面草率完結著交與內務府嚴加議處綏赫德著革職司庫八十五筆帖式巴圖等名下虧缺之項悉從本人追出交官再織造本非大員而在外體統任意僭越至於司庫筆帖式官職尤卑乃以欽差爲名妄自尊大與督撫拜帖稱呼俱用平行禮妄誕已極嗣後著嚴行禁止儻有以片紙隻字平謁地方官及不按品級規矩僭越妄行者定行從重治罪○己巳以舒喜爲禮部右侍郎由御史遷○壬申兵部議准直隸河道水利總督王朝恩等奏直隸河標見在議設營制請將附近天津之務關路參將改爲河標左營中軍副將務關守備改爲中軍守備仍駐務關張灣營守備改爲河標右營遊擊仍駐張灣務關崔黃守備改爲右營守備

移駐天津其崔黃留把總一員駐防仍歸左營轄武清之蒲溝汛暨楊村蔡村務關二汛俱歸左營轄務關以北安平灤縣香河西儀四汛與張灣二汛俱歸右營轄添設隨標千總一歸左營轄把總一歸右營轄並請於左右兩營共抽兵六十名駐天津再務關原轄之寶坻一營永樂一汛距河遙遠請仍歸鎮標轄從之○甲戌諭戶部福建臺灣府彰化縣經兇番擾害之後百姓耕種未免失時該縣所有雍正八九年分未完穀六千五百餘石著悉行豁免○乙亥豁免江南吳江震澤二縣坍沒湖田額徵銀一千一百三十餘兩○增廣東南澳海防軍民同知一○吏部尙書勵廷儀故遣官奠茶酒○己卯大雨○甲申諭內閣八旗辦事不諳悉條例諸事每多未協朕思各部司官多有熟悉則例識見明通者若於郎中員外等官內慎加揀選每旗添設二員助都統副都統辦

理旗務似有裨益該員於本職部務仍照舊辦理都統等奏事時該員隨副都統之後本章奏摺內亦著列名著大學士會同各部堂官加意揀選務在得人若司員不敷揀選科道侍讀等官亦可選用○頒 御製重修闕里 聖廟碑文墨筆收藏闕里以爲世守從 衍聖公孔廣榮請也

閏五月丙戌朔增陝西寶豐定遠二營守備各二把總各二○戊子免陝西甘涼甯肅各提鎮營兵借支銀一萬八千四百兩有奇○丙申護甯遠大將軍岳鍾琪奏據駐紮魯谷慶總兵官王建瑞稟報賊人寨桑額爾克得松領兵千名分東西二路來犯哈喇火州城參將劉廷琰遊擊李英等分兵迎敵殺傷賊人俱皆敗走劉廷琰等領兵追剿賊人遠遁因見黑霧大風不便窮追撤兵回城臣等仍飛飭王廷瑞晝夜嚴防時加哨探報聞○丁酉諭入旗官

員人等朕自御極以來普天率土未嘗歧視而入旗人等尤國家教養百年望其遂生復性共享安樂於久遠若其中頑劣貪鄙之習故加寬縱將爲人心風俗憂無所底止朕實不忍聽其陷溺不爲援手有負 皇考之付託也從前嚴治貪婪清釐帑項卽追呼牽擾有所不恤者誠欲入旗人等各思罪愆漸自醒悟知有所不爲庶無往不利此朕訓愛之之初心也昨於雍正三年以前虧空各項令查奏酌免諭旨內業經明白曉諭今特再沛恩膏將雍正三年以後九年以前入旗官員人等應追銀兩除本身虧空侵蝕借帑及貪贓盜用等項不准查免外其有年遠之案於雍正八年恩旨以後發覺者與本身已故著落子孫追賠坐扣俸餉抵補者或本身雖在其應追之銀實係分賠代賠無著之項或因公那用並未入己者又或應追之本人已經豁免而開欠之人尙在著追

或本身已經寬免而在奉旨以前報出田房人口抵補其間人口
病故田房變價不敷仍行追補者著該旗將各項情由造冊開送
內閣轉奏候朕酌量分別加恩寬免此次諭旨著再徧傳俾八旗
人等深知朕恩恪遵朕訓洗心滌慮痛改前非循理奉公謹身節
用以副朕教育淳誠之至意○辛丑禮部議覆甯古塔將軍常德
奏長白山爲發祥福地神迹顯著請於烏喇之板山望祭處蓋造
享殿以肅祀典從之○裁山西代州營千總一增冷泉關營千總
一改冷泉關營把總爲潞澤營把總○移廣東化州梁家沙司巡
檢駐平定堡○癸卯以常有協辦戶部侍郎事副部統○甲辰恒親
王允祺薨輟朝三日加祭二次造墳立碑諡曰溫○宗人府以允
祉病故奏聞得旨三阿哥允祉向來秉性乖張器量狹小皇考
每言其不識忠孝大義自朕卽位以來屢次加恩不知感激時爲

開導不知省悟朕皆優容之近年則强悍難制漸無忌憚經諸王大臣等參奏朕不得已將伊拘禁於景山之永安亭令伊眷屬隨往供其使令並將伊子弘景封爲貝子以承其家業此朕委曲措置之苦心也近因患病醫官前往調治奈病勢沈重醫藥罔效朕心惻然一切殯葬之禮著照郡王例賞內庫銀五千兩料理喪事

○己酉予故太子少傅吏部尙書勵廷儀祭葬加祭一次諡文恭

○庚戌福建巡撫趙國麟奏臺灣北路大甲西番不法殘害官兵經臺灣總兵官呂瑞麟同臺灣道倪象愷帶領兵壯剿撫兼行已將脅從之樸仔籬等社先後就撫續有鳳山縣南路奸民乘機聚眾殺傷官兵經升任陸路提督王郡親率弁兵剿追解散今南路奸匪陸續拏獲究審見在嚴緝首犯吳福生到日卽可定案其大甲西番土官率領全社男婦老幼四百十九名造冊就撫見在查

訊實情究出首兇定擬仍於各莊緊要之處設兵防護南北兩路
安定報聞○辛亥岳爾岱因病解任以兆華署理總督倉場侍郎
由給事中署○癸丑諭內閣大學士蔣廷錫見在患病尙須調養戶部

尙書事務著兵部尙書鄂爾奇左都御史彭維新署理刑部尙書
事務著浙江總督李衛署理鄂爾奇仍管兵部尙書事○甲寅甘
肅巡撫許容奏五月間五月間甘省各屬俱陸續得被甘霖因從
前得雨稍遲豆麥有薄收之處其臨屬之蘭州鞏屬之靖遠涼屬
之平番得雨最遲夏禾麥豆俱已枯槁止可補種晚禾得旨朕念
甘省備辦軍需未免煩勞民力而各屬內又有收成歉薄之州縣
意欲將本年甘肅各屬錢糧全行豁免以加惠秦民但諭旨到日
已屆初秋開徵既久錢糧多已完納不能普徧霑恩凡得雨稍遲
之處著許容將舊欠新賦悉行停徵再與查郎阿悉心計議或將

備辦軍需州縣之錢糧全行蠲免其中收成稍薄者再加賑恤其
不辦軍需之州縣而收成又復照常者仍照額賦徵收著會同密
議具奏○乙卯諭內務府見今天氣炎熱著海望會同署步軍統
領鄂爾奇在各門設立冰湯以解行人煩渴工部所窖冰塊如不
敷用卽將崇文門宣課司餘銀採買辦理永著爲例○免湖南湘
陰縣流沙地畝額賦

六月己未以阿山爲吏部右侍郎

由內閣學士遷

○癸亥諭內閣大學士

鄂爾泰上年來京陛見朕以雲貴廣西三省地方緊要本欲令其
回總督之任今因西北兩路軍務尙資協贊經理其眷屬不便久
住滇南著總督高其倬等將大學士家口料理進京其雲貴廣西
地方緊要事宜有應知會大學士鄂爾泰者仍行知會並三省文
武官員應稟報者照常稟報將此通行曉諭三省官弁知之○丙

寅以史在甲爲左副都御史

由大理寺卿遷

○丁卯護甯遠大將軍岳鍾

琪奏據賊營脫歸之鄂爾多斯參領阿玉錫供稱噶爾丹策零令小策零敦多卜領兵三萬來犯北路賊兵隊內並有投降準噶爾之巴濟達錫達爾扎貝子茅海台吉冊凌協理台吉益蘇克岱青等五人引路以大隊搶掠察罕叟爾附近居住之喀爾喀等直至克爾倫地方巴濟並獻計與噶爾丹策零云喀爾喀等係懦弱之人可以肆行搶掠等語謹奏得旨巴濟等有負國恩實當誅戮伊並不以投順賊人爲恥反欲取信於賊妄稱喀爾喀懦弱易於搶掠殊屬可惡喀爾喀等一聞此語自必痛心切齒奮勇爭先矣著行文順承親王曉諭軍前喀爾喀等知之○己巳四川總督黃廷桂奏建昌鎮所轄竹核地方當涼山中爲苗疆腹心其東南一路有吡姑及魚紅地方層巒疊嶂爲諸蠻出入門戶請增遊擊一守

備一千總二把總四兵五百名谷堆地方爲咽喉要道請增都司
一千總一把總二兵四百名其東北一路有格落地方及蠻部出
沒之處請增都司一千總一把總二兵四百名至於大赤口爲竹
核左翼門戶且有諸夷盤踞請增參將一守備一千總二把總四
兵八百名其小河壩地方所在險要請增都司一千總一把總二
兵四百名又竹核西距靖遠營一百七十餘里中係諸夷巢穴請
於適中之勒必鐵地方撥靖遠營守備一把總一兵一百五十名
駐守再竹核去新舊營汛甚屬遼遠非建昌一鎮所能統轄請將
竹核協副將改設總兵一左右二營都司改設遊擊再增中營遊
擊守備各一千總二把總四兵三百名共一千五百名分爲三營
以成體制其竹核迤南一帶有阿都等處地名更大夷蠻愈眾俟
設鎮安營之後再行次第料理得旨黃廷桂所奏竹核安兵設鎮

一事關係緊要朕聞川省蠻地從前雖屢次用兵然或懸賞誘致指爲投誠並未加以懲創又或兇蠻逃避而附近良懦轉遭搶擄以致眾心不平前案未結而變端復啟又或畏難退縮捏報撤師草率完結此次竹核安兵設鎮務須籌畫周詳布置完密俾邊圉永靖始爲有益大學士鄂爾泰熟悉彼地情形著悉心詳議具奏尋議川屬涼山一帶周圍數千里竹核適當其中形勢寬平四達蠻境各種番蠻皆反覆不常岳鍾琪前議於竹核設副將一協兵止一千二百名固屬單弱不足以資控制今黃廷桂請將竹核改協爲鎮並分設各營所議已屬周詳但名爲一鎮兵不過一千五百名且總覈兵數雖有四千名而零星分布仍不足壯聲勢而鎮番蠻據臣愚見竹核鎮營固須妥算而阿都等處應並熟籌兵力宜合不宜分蠻巢宜遠不宜近但使我勢聯絡不必是處設防臣

謹擬於竹核一鎮設兵三千名內撥兵一千名分駐吡姑格落等處魚紅大赤口阿都沙馬普雄地方各設參將一營額兵各一千名互爲犄角則涼山雖闊蠻種雖繁而一重鎮五大營上連建昌下接昭通三鎮雄峙舊營環拱控馭則指臂相牽擒剿則呼吸立至如果將弁得人似可邊圉永靖其作何安設塘汛可否抽撥弁兵伏祈 皇上敕下黃廷桂等毋專執成議亦毋以臣言爲然熟商妥酌請旨定奪從之○壬申署雲貴廣西總督高其倬奏雲南普洱府屬思茅土把總刀興國勾結苦蔥蠻悖叛煽動元江夷人圍攻普洱府城又通關大寨獺夷附和苦蔥過阿黑江犯他郎地方元江營守備馬漢勛率把總康天錫深入陣亡臣卽調遣迤東迤西官兵令臨元鎮總兵官董芳總統節制由元江景東兩路剋期進剿報聞○甲戌靖邊大將軍順承親王錫保等奏據賊營脫

歸之喀爾喀根都爾錫等供稱小策零敦多卜領兵於奇林處會齊從布拉罕等處發兵一萬五千和通胡爾哈等處發兵一萬五千二路來犯阿爾泰於七月間進兵等語臣等思準噶爾賊性姦狡或一路而來或分路前進俱不能豫定今將特斯路豫防一萬精兵擇水草處駐紮外再將軍達爾濟所領兵丁尙未到白格爾范清燠所運之米已有三千餘石運到白格爾地方應加防守臣等見派原任提督周瑛何祥書等統領三千綠旗兵丁前赴白格爾駐紮又調副都御史阿成所領家選兵二千臣處黑龍江兵一千內扎薩克兵一千喀爾喀兵二千同駐台錫里山以三千綠旗兵爲翼在白格爾深溝高壘嚴排鹿角防守糧米既可要賊之來路策應達爾濟遠來之兵亦甚有益報聞○乙亥實授索柱內閣學士○辛巳辦理軍機大臣等遵旨議奏喀爾喀扎薩克一等台

吉策勒克率領四十餘人與準噶爾賊人連戰二次奮勇殺賊以致陣亡伊子孫屬下人等俱被賊人搶擄其子密什克被賊擒去十日方能脫出見在伊母處 皇上軫念策勒克等實心效力特沛恩膏賞策勒克妻銀五百兩段十匹伊屬下人等各賞銀十兩段一匹得傷者加賞銀五十兩順承親王已行文扎薩克圖汗親王策旺扎卜遵旨頒給至策勒克之一等台吉其子密什克或蒙恩加等承襲恭候 欽定得旨台吉策勒克奮勇陣亡可憫可嘉策勒克著追封輔國公令伊子密什克世襲罔替伊等家產著順承親王豐裕賞給以圖永久○壬午吏部議奏八旗都統印房筆帖式五年效力期滿調補部院者向未議定何等品級見在俱用爲無品筆帖式請照八旗左右二司筆帖式之例定爲八品令其食俸庶品級均平以示鼓勵從之

東華錄

雍正二十一

臣王先謙敬編

臣周澗蕃恭校

秋七月乙酉朔諭內閣我朝設立各省駐防兵丁原以捍衛地方申明武備其歷來所定規條俱屬盡善無可更張乃近有以一二事瀆陳朕前者一則稱駐防兵丁子弟宜准其各省鄉試獨不思國家設立駐防弁兵原令其持戈荷戟備干城之選非令其攻習文墨與文人學士爭名場屋也在弁兵之子弟有能讀書向學通曉文藝者原聽其來京應試以廣伊等進取之途並未禁其從事文學也若悉准其在外考試則伊等各從其便競尙虛名而輕視武事必致騎射生疏操演怠忽將來更有何人充駐防之用乎況我聖祖仁皇帝臨御六十一年所以教養弁兵者至周至渥如

果應行早已著爲令典又何待今日之喋喋敷陳乎一則稱駐防兵丁身故之後其骸骨應准在外瘞葬其家口應准在外居住獨不思弁兵駐防之地不過出差之所京師乃其鄉土也本身旣故之後而骸骨家口不歸本鄉其事可行乎若照此行之日久將見駐防之兵皆爲漢人是國家駐防之設竟爲伊等入籍之由有是理乎以上二條皆事之必不可行者著將朕旨頒布於外俾無知之人豁然醒悟不得再行妄奏○諭工部尙書馬喇不曉部務辦理該旗事件亦多昏聩率意著革職○實授常有戶部右侍郎○丙戌以武格爲工部尙書轉托時爲刑部左侍郎以覺和托爲刑部右侍郎由郎中遷○丁亥山東巡撫岳濬奏曹州鉅野縣民李恩家本年六月初五日牛產瑞麟屬身牛尾偏身皆甲甲縫有紫毫玉定文頂光彩爛生實爲盛德瑞徵請詔付史館宣示中外得旨山

東地方前歲被水百姓不獲甯居去夏今春雨復愆期朕遣官發粟賑恤多方幸未至流離失所卽京師去夏今春晴雨亦不均調西北兩路不得已用兵征戍將士露處於外備極勞苦朕心戒懼修省但知感上天垂象示儆之恩不敢望嘉祥之誕錫今聞瑞麟產於東省實增愧悚該撫奏請詔付史館宣示中外皆屬虛文將朕朝乾夕惕對越上天之惓忱曉諭天下臣民共知之○己丑諭內閣朕師傅原任尙書顧八代子孫甚貧著加恩賞銀一萬兩○庚寅禮部議准湖北巡撫王士俊奏荊州府江陵縣爲關聖帝君盡忠授命之地冢墓見在當陽今有五十二代孫歲貢生關朝泰歲時奉祀請照解州洛陽守祠之例授爲五經博士准其世襲從之○壬辰以甘肅百姓輸輓勤勞免河東河西各屬應徵銀米草束已經完納者准作來年正賦○解諾穆圖任以鄂昌爲

陝西甘肅布政使由前夏道遷

○甲午增江南江甯水師守備一把總

二駐江口歸江甯將軍轄京口水師都司千總把總各一駐高資

港歸江陰副將轄移朱張圩千總駐大沙順江洲大港把總駐朱

張圩歸鎮江營轄○乙未賜大學士鄂爾泰第宅一區○命四川

省開局鼓鑄○丙申調鄂爾奇爲戶部尙書性桂爲兵部尙書以

福敏署工部尙書

由左都御史署

○護甯遠大將軍岳鍾琪奏移駐穆壘

官兵臣等遵旨於六月二十七日辰時分作兩路啟行臣同副將

軍常賚統兵一萬二千名由闊舍圖大路直進副將軍張廣泗同

署鎮安將軍卓爾統兵七千餘名由鄂龍吉之北約洛圖一路前

進兩路官兵約於闊舍圖地方會合更派官兵四千餘名委副將

譚定邦馮廷雄總理糧運護送車輛駝隻分爲四運而進又委總

兵岳含奇帶領湖廣官兵殿後凡應行事宜統俟師抵穆壘之後

次第料理報聞○丁酉命少保大學士伯鄂爾泰督巡陝甘經略軍務○戊戌諭辦理軍機大臣等西路軍營事務岳鍾琪辦理總不妥協著回京其甯遠大將軍印務著署陝西總督查郎阿署理副將軍張廣泗暫行護理查郎阿年來辦理軍務事事合宜克勝大將軍之任但肅州路遠未便來京請訓今特命大學士鄂爾泰馳驛前往肅州傳朕訓諭查郎阿著先期料理並賞給公用銀一萬兩陝西總督印務及所辦軍需事著直隸總督劉於義前往署理賞銀五千兩朕於訓諭劉於義之處亦著大學士鄂爾泰傳旨許容范時捷俱著在肅等候查郎阿起身時著知會提督樊廷一同出口○以李衛署直隸總督程元章署浙江總督徐本署安徽巡撫鍾保署湖北布政使

原任甘肅布政使

○己亥諭內閣貴州提督哈

元生朕另有簡用之處著馳驛來京陛見並賞給公用銀三千兩

製備衣裝貴州將弁內有伊平日所深知之幹員准揀選四五人令其隨後來京亦著巡撫給與驛馬並酌量每人賞給銀兩以資

路費○庚子召王國棟回京以程元章兼管浙江巡撫事○加蔣

洞侍郎銜往肅州辦理軍營事務以溫而遜署山西布政使由按察使

署○辛丑諭辦理軍機大臣等據靖邊大將軍順承親王錫保奏

稱七月十四日賊眾來侵烏孫珠爾處傅爾丹等接戰數次敗賊

前隊及賊兵後隊全至盡力衝突我師失利還歸大營等語烏孫

珠爾處傅爾丹領兵萬餘既已破賊前隊則後隊自應敗去如何

我師遂被衝散回營用兵失機罪在不赦去歲傅爾丹冒昧進剿

損傷官兵迫回科布多時尙能整頓軍旅邀截賊眾是以特恩寬

免其罪理應竭力報效冀雪前恥何以又復僨事儻因賊眾我寡

恐有疏失相機回營尙屬可原若係輕躁懦弱以致失機卽應革

職嚴加議處或官兵內有見敵先潰者卽應正法示眾著大將軍
順承親王秉公詳查據實陳奏○甲辰移直隸天津府鹽捕通判
駐青州分司所屬之越支場裁滄州分司所屬之利民阜民利國
富民海盈阜財六場鹽大使缺其竈戶歸各該州縣管轄○乙巳
諭辦理軍機大臣等國家重務在於用兵凡領兵大員有表率之
職者必合志同心聯爲一體屏畛域之見去推諉之私始能奮勇
直前以濟公事焉有各懷疑貳互相推卸尙能壯三軍之氣而成
克敵之功乎劉世明武格伊禮布等志氣頽惰俱懷怨望之心而
劉世明與武格又復彼此推諉將一營軍務視爲兩歧伊等俱係
國家重用之大臣而居心行事如此無怪乎將弁兵丁等相率效
尤怠惰偷安無振作同仇之氣也似此深負簡任全不思國家不
得已而用兵之苦心著嚴切傳諭劉世明武格伊禮布知之○大

學士蔣廷錫卒遺疏聞得旨大學士蔣廷錫受 皇考聖祖仁皇帝知遇之恩簡直內廷教誨玉成二十餘載自朕卽位由學士升授侍郎旋擢尚書簡命爲大學士蔣廷錫才識優長經猷明練其總領度支則謹慎出納釐剔弊端其參贊軍務則恪敬小心周詳慎密綸扉重地倚賴方殷上年忽患痰證特遣良醫調理漸次獲痊今夏舊恙舉發較前加劇朕心憂慮切諭太醫竭力調治每日病狀著兩次奏聞方期夙疾有瘳豈料溘焉長逝朕心傷悼輟朝一日其所用棺殮之屬皆頒自內府已命內大臣率領侍衛賜奠茶酒應得卹典著察例具奏柩輓回籍時再著散秩大臣帶領侍衛前往奠酒送其起程戶部滿漢堂司官亦著往送沿途文武官弁在二十里以內者俱著至輓前弔奠並遣人護送○丙午增廣西馬平縣屬三都汛穿山鎮巡檢各一○丁未諭內閣侍郎杭奕

祿著由西安前赴甯夏等候大學士鄂爾泰有面傳之旨其西安所辦軍需事件著內閣學士德齡協同左都御史史貽直辦理○山東巡撫岳濬奏曲阜縣六月二十五日午時皎日正中慶雲環捧日輪五色絢爛又於日之西南有霞光三道歷午未二時細細不散正值孔林工竣之時上瑞疊臻千秋罕遇得旨朕素不言祥瑞惟有朝乾夕惕感上天垂象示儆之恩何敢冀嘉祥之疊錫已屢降諭旨訓教天下臣民但自信生平尊師重道出於至誠闕里爲聖人之鄉尤切冀牆之慕前歲文廟重新慶雲湧見今園林工竣復覩嘉祥或者朕誠敬之衷爲神明之所歆格故顯示以象用昭日監在茲之義與朕感慶之下倍增虔悚爰諭天下臣民共知之○己酉諭內閣據湖南巡撫趙宏恩奏南嶽爲朕主壽之山廟宇碑亭宜加重葺朕思皇天無親惟德是輔朕受天眷

命爲天下主一行事一舉念皆上天皇考之所照臨若身無

失德自蒙垂慈護佑儻德行有虧居心行事獲罪於天天下億萬臣民豈能代朕祈禱而寬其譴責乎朕御極以來無日不以此訓示天下臣民凡有奏請建壇誦經爲朕祝釐延壽者悉嚴諭禁止至於山嶽江河之神爲地方捍患禦災賜福兆庶者則虔修祠廟潔誠展祀以申報享之忱並非爲朕一身祈福也上天皇考

實鑒此衷南嶽之神佑我楚民廟貌久未修理應照該撫所請敬謹舉行惟是趙宏恩陳奏之詞識見鄙陋不知朕心用頒此旨再

行宣諭俾眾共知之○以左都御史福敏協理大學士○以鄂善

署兵部侍郎

由內務府總管署

○辛亥增山西繁峙縣平刑站大同縣聚

樂站驛丞各一○癸丑以唐執玉兼理刑部尙書事○甲寅諭內

閣向來大計參劾官員除貪酷發審外其餘俱送部引見嗣後特

參文武官員比照大計之例列在浮躁不及等款亦著送部引見永著爲例

八月乙卯朔以戴永椿署山西按察使

由御史署

○靖邊大將軍順承

親王錫保奏目今準噶爾賊人前赴危得爾河源地方臣等偵探已確酌議於奔博圖山嶺發兵堵截共派滿洲蒙古兵一萬八千名令王丹津多爾濟總統額駙策凌王羅卜藏喇錫桑里達貝子特古斯羅卜藏公羅卜藏參贊查克旦塔爾岱阿岱前鋒統領塔爾馬善副都御史阿成阿副都統阿那布胡習禮額爾勤烏察拉王常哲庫訥阿思哈布爾沙貝勒僧滾扎卜公羅卜藏策布登沙津達賴等分派督率於七月二十一日起程報聞○丙辰諭宗人府海善從前甚屬狂妄近已悛改著加恩賞貝勒原銜○免雲南昭通東川二府雍正九年分未完額賦以八年被兵瘡痍未復也

○丁巳改廣西右江道原轄之鎮安府歸左江道轄南甯府原轄之胡潤寨及下雷土州俱歸鎮安府轄○庚申禮部議准順天學政吳應棻奏順天府童生考試舊例除大宛二縣屬府丞專理外其餘二十三州縣於州縣考試後俱由霸昌道錄取轉送查霸昌道駐紮昌平州各州縣有往返八九百里或六七百里者殊屬未便嗣後請就近改歸四路同知各按所屬州縣錄取轉送永著爲例從之○壬戌諭內閣向來偷竈人獲之犯若係滿洲蒙古則發往江甯荊州有滿洲兵駐防之省城當差若係漢軍漢人則發往廣東廣西雲貴煙瘴地方當差近聞發遣廣東人犯例在崖州陵水等處此地水土最惡易染疾病每多傷損朕思此等不良之輩雖孽由自作然其情罪較之盜犯尙覺稍輕卽發遣之本意亦欲全其性命也今因水土不服以致傷生殊可憫惻若將此等人犯

改發沿海一帶衛所入伍充軍俾得保全軀命似亦法外之仁著
廣東督撫會同按察司確查議奏其雲貴廣西等處地方風土有
與此相類者亦著該督撫將如何改發之處妥議具奏○兵部議
准河東總督田文鏡奏登州鎮新添兵一千名其中右二營請添
設千總一把總一外委三以資約束從之○西路副將軍張廣泗
等奏臣等自巴爾庫爾起程七月十一日直抵穆壘竊見穆壘地
處兩山之間築城其中形同釜底又兩山蔓延叢雜受敵甚易據
守甚難實非屯兵進取之地查巴爾庫爾地處平原南北兩山南
山綿亘數千里直至伊犁北山漸折而西南至闊舍圖與南山鎖
合實爲巴爾布爾之關鍵再西烏闌烏蘇口則北山已斷南山之
北卽屬沙磧是以康熙五十四年間大兵屯駐巴爾庫爾卽於闊
舍圖派兵駐守今請於闊舍圖駐紮重兵闊舍圖以西之烏闌烏

蘇口南山一帶之陶賴無克克嶺北山一帶之小闊舍圖色必忒
鄂龍吉察罕哈麻爾鏡兒泉及糧運臺站經由之噶順吳爾圖哈
必爾漢等處俱各安駐兵丁則與巴爾庫爾大營形勢通聯可免
賊人窺伺但此事宜迅速舉行交冬降雪則沙磧地面賊人肆意
出沒萬難籌畫矣得旨所奏甚爲明晰著速卽辦理並傳諭大學
士鄂爾泰署大將軍查郎阿目下撤兵之後如何防範進剿並吐
魯番回眾作何安插之處詳悉酌議辦理張廣泗又奏臣抵穆壘
之後身親閱歷見大將軍岳鍾琪調度兵馬籌運糧餉以及統馭
將士之處多屬乖方不敢不據實列奏一穆壘兵丁除滿洲蒙古
外其綠旗多係步兵而日行站程俱係五六十里七十餘里不等
路徑崎嶇身負口糧器械炎日奔走沿途困憊迫行抵穆壘全無
布置及探有賊騎窺覷岳鍾琪倉皇忙迫令闔營官兵沿山架梁

兩三晝夜不得休息其派撥兵丁旋派旋移略無甯所一穆壘城工未就駐紮營盤關繫甚重臣與副將軍常賚兩營所駐正當西北要衝乃派兵止二三百人或百餘人卽岳鍾琪營盤亦僅兵丁數百人儻遇有警將何以抵禦至於部曲隊伍自有一定統束岳鍾琪每值調撥築於各營分攤在兵丁則爲雜湊在官弁則非本營且如鎮協以至于把所屬兵丁一經抽撥卽應以該管官帶往餘留者竟之統束猝遇別有調撥不得不另委將弁官與兵素不相識徒滋紛亂一準噶爾賊人專資馬力我兵致敵必須馬步兼用而岳鍾琪立意用車查車戰利在平原今自巴爾庫爾至穆壘沿途溝塹崎嶇或紆道繞過沙磧情勢總不相合至馬步兵丁除弓箭鳥槍外止令各帶木棍一根大刀長戟等械全無豫備官兵莫不竊議一岳鍾琪堅執穆壘地方可以牧放駝馬今經細勘並

無收放之處倒斃甚多因令綠旗兵留馬二千匹餘悉趕赴烏闌
烏蘇闌舍圖一帶牧放查烏闌烏蘇闌舍圖止駐二千餘兵差使
繁多何能分管牧馬且距穆壘甚近萬一賊人窺伺勢難兩顧殊
屬可虞一穆壘駐兵數萬糧運最爲緊要岳鍾琪初謂車行甚易
加以駝運至九月可運貯十萬石不至缺誤今查車路多亂山大
嶺必須繞從沙嶺正屬賊人出沒要衝難於防護兼之岳鍾琪一
聞賊信不論虛實輒令停止糧車似此遲緩轉瞬冰雪在地運送
更艱數萬之眾何所託命一岳鍾琪罔恤士卒號令不明鎮將大
員時加呵斥參遊以下日事鞭箠平時議論風生或聞小警張皇
失措性復剛愎不喜人言題奏事件奉到諭旨數月不宜臨事突
然傳示令人莫測誠僞諸事怪僻難以悉數臣雖力圖規正無奈
置若罔聞軍務重大不敢代爲徇隱祈 皇上乾斷報聞○改直

隸馬蘭鎮屬松棚路千總一羅文峪把總一兵一百十一名仍歸
薊州協轄○癸亥諭辦理軍機大臣等據副將軍張廣泗等奏稱
穆壘形勢四面受敵必不可以駐紮大兵牧廠運道正在可虞交
冬下雪之後賊人無處不可出沒甚難籌畫等語上年據岳鍾琪
奏稱巴爾庫爾屢被賊人侵擾穆壘形勢實爲萬全之地願以全
家性命保其有益無害是以廷議允從其請今張廣泗等所奏如
此則岳鍾琪欺罔之罪擢髮難數矣目今賊人聞知穆壘駐兵之
信必悉力前來阻撓侵擾惟是賊眾見在盤據北路未必更有多
人分向西路我兵速乘此時撤回巴爾庫爾乃第一要策也不必
更有遲回至所稱闊舍圖烏蘭烏蘇等處各分別駐兵等語伊等
身在地方必有真知灼見聽其酌定就近辦理務期妥協至於吐
魯番回民年來輸誠向化情甚可憫我兵旣撤之後回民應如何

料理或酌留官兵在彼防護或將頭目緊要之人安插近地著張
廣泗等就近商議辦理○乙丑增四川泰甯巡檢一○丁卯移福
建龍巖縣丞駐溪口雁石司巡檢駐適中驛○庚午辦理軍機
大臣等議奏據辦理藏務侍郎僧格等奏巴爾布國雅木布葉楞
庫庫穆三汗在西藏極邊遠處萬里之外與中國從未相通今仰
慕 皇仁特遣使請安進貢方物辭意誠懇應令來使至京朝見
但天寒路遠往返務須二年應行文僧格等宣布 皇上體恤遠
人之意轉諭來使令其旋歸並加恩賞賚給與馬匹更換俾得從
容起程得旨依議敕諭巴爾布國雅木布葉楞庫庫穆三汗曰據
爾等奏稱從前不知內地禮儀未遂觀光之志今遣使朝覲恭請
訓諭進貢之物不多略盡敬恭之忱等語朕爲天下主一視同仁
爾等汗越在邊遠自古未通華夏慕朕仁化萬里輸誠朕甚嘉悅

所進方物悉已收納第念道路遙遠往返艱難爾使臣卽由西藏
遣回爾等汗但與西藏貝勒頗羅鼐協力和衷維持黃教以副朕
普育羣生之至意特賜段匹玻璃甕器各種一併發往○予故太
子太傅文華殿大學士蔣廷錫祭葬加祭一次諡文肅○壬申北
路副將軍王丹津多爾濟額駙策凌奏臣等奉大將軍王錫保調
委統領滿洲蒙古索倫喀爾喀等兵二萬餘人追擊準噶爾逆賊
至厄爾得尼招地方於八月初五日遇賊連擊十餘次日暮追至
大山梁閒殺賊萬餘屍徧山谷河流盡赤負傷逃走者甚眾所獲
器械駝馬牛羊無算見在賊眾逃往鄂爾昆上游向推河而去臣
等率領大兵自厄爾得尼招起程尋敗賊蹤跡追剿前進報聞○
癸酉諭辦理軍機大臣等據王丹津多爾濟等報稱八月初五日
在厄爾得尼招地方我兵與賊人交戰賊眾大敗由鄂爾昆之上

游向推河逃遁而去等語可將原摺錄寄大學士鄂爾泰署大將軍查郎阿知之賊人既由西爾哈腦兒投阿爾泰而去若遇雪阻截必向阿濟一帶潛行向巴爾庫爾以覓生路大學士鄂爾泰等速將北路得勝情由寄知巴爾庫爾軍營令其於阿濟要隘之處派兵堵截毋得疏忽再者穆壘大兵撤回之時賊人或於中途窺伺或潛襲我軍之後務須加意防範至於巴爾庫爾乃根本之地亦須計算萬全俱著大學士鄂爾泰等就近妥協籌畫○參贊內大臣侯馬蘭奏八月初九日賊夷二千餘人來犯西爾哈尼招臣選兵一千一百名同副都統費雅思哈士默特總管珠胡代喀爾喀協理台吉孫都布帶領出城迎擊賊兵大敗斬殺百餘人獲器械無算次日追至那壘果爾地方賊夷連夜遁去隨行知綏遠將軍馬爾賽並報大將軍順承親王報聞○乙亥諭辦理軍機大

臣等劉世明由侍衛之職朕加恩用至總兵提督伊在提鎮任內居官尙好是以用爲福建巡撫升授總督上年西路領兵需人朕念伊熟悉邊地情形特召來京命爲副將軍授以巴爾庫爾領兵之重任料伊受朕深恩必思黽勉宣力爲將弁之表率豈知伊苟且瞻顧退縮不前全無奮勵振興之氣旣忝職任重負國恩著革職交與署大將軍查郎阿照總兵或副將之例於領兵艱苦之處令其效力贖罪儻再有錯誤疏忽卽行參奏在軍前正法○戊寅靖邊大將軍順承親王錫保奏副將軍王丹津多爾濟額駙策凌等追賊至厄爾得尼招奮勇擊殺賊眾萬餘除檄行綏遠將軍馬爾賽建勳將軍達爾濟各領兵截殺外臣選派三千兵馬委扎薩克台吉葛木丕爾前鋒參領達度等率往截殺卽日起程報聞○己卯岳爾岱病痊命仍回倉場侍郎任○壬午移廣東合浦縣縣

丞駐永安○癸未實授李衛直隸總督郝玉麟福建總督程元章
浙江總督鄂彌達廣東總督徐本安徽巡撫楊永斌廣東巡撫鍾
保湖北布政使甘汝來廣東布政使○甲申命撥戶部庫銀二百
萬兩解送北路軍營備賞給有功官兵之用○增山東濟甯河標
城守營千總一把總二○是月免江南滁州甯國等五州縣雍正
九年水災額賦有差

九月乙酉朔諭辦理軍機大臣等此次準噶爾逆賊志欲搶奪澤
卜尊丹巴胡土克圖侵掠喀爾喀部落直越察罕叟爾大營由杭
愛山肆行猖獗王丹津多爾濟額駙策凌參贊大臣塔爾岱及諸
王大臣台吉等共領滿洲蒙古喀爾喀等兵二萬奮勇尾追千里
到鄂爾昆河厄爾得尼招地方諸王大臣及台吉官兵等同心協
力爲國輸誠奮勇攻擊將三萬逆賊斬殺大半餘賊喪膽奔逃甚

屬可嘉此次軍功非尋常勞績可比官員兵丁著從優議敘其隨從額駙策凌在克爾森齊老地方擊賊官兵著加倍議敘領兵效力之王貝勒貝子公扎薩克台吉等應賞巴圖魯名號升授職銜今於議敘軍功之先特沛恩綸喀爾喀和碩親王丹津多爾濟著賞給智勇名號喀爾喀和碩親王額駙策凌著賞給超勇名號喀爾喀多羅貝勒冊卜登從前在阿爾泰軍前著有勞績去年在蘇克阿爾達胡地方攻擊準噶爾又懋著勤勞朕已賞給信勇名號此次在厄爾得厄招大敗準噶爾賊眾又復追擊效力前驅冊卜登著封爲多羅郡王扎賴特固山貝子特古斯從前在阿爾泰軍前曾效力行走此次在克爾森齊老擊賊甚力在厄爾得厄招又復大敗賊眾建立功勳特古斯著封爲多羅貝勒敖漢輔國公羅卜藏隨從額駙策凌在克爾森齊老擊賊又在厄爾得厄招大敗

賊眾又與貝勒冊卜登塔爾岱等追擊賊眾效力前驅羅卜藏著封爲固山貝子喀爾喀扎薩克一等台吉巴海從前在阿爾泰軍前曾效力行走去年亦著有勞績此次在厄爾得厄招大殺賊眾建立功勳喀爾喀扎薩克一等台吉葛本丕爾去年懋著勞績此次在克爾森齊老額駙策凌隊內力戰得傷回至察罕叟爾軍營調治痊好復行前往追擊賊人巴海葛本丕爾俱著封爲輔國公塔爾岱著授爲黑龍江將軍統領軍營東三省兵丁卓爾海著授爲內大臣署理黑龍江將軍事務其餘扎薩克喀爾喀王貝勒貝子公台吉內若有似此勞績出眾之人而遺漏者著大將軍順承親王丹津多爾濟額駙策凌查明具奏○諭朕念馬爾賽之祖圖海功績令其配享 聖祖皇考於 太廟馬爾賽所襲之三等公爵加爲一等擢用爲大學士復賞阿達哈哈番令伊子承襲恩施

稠疊眾所共知朕以爲馬爾賽必感戴殊恩實心爲國效力因授爲大將軍遣往軍前乃伊未至歸化城先將馬匹牲畜傷損數千在口外第八臺處聞科布多地方準噶爾賊眾消息便自怯懦奏請往歸化城又將馬匹牲畜不擇好水草之處牧放折損大半且不禁約兵丁縱其貪饕飲食肆意糜費以致變賣衣服如此乖謬妄爲之罪朕猶寬恕與以效力贖罪之途授爲將軍令往扎克拜達里克而馬爾賽沿途又不調養駝隻倒斃數千然朕猶優容之望其效力也頃準噶爾賊眾來犯察罕叟爾之大兵直越杭愛搶奪喀爾喀等部落王丹津多爾濟策凌參贊塔爾岱等率領大兵尾追至鄂爾昆之厄爾得尼招地方大敗賊眾殲其大半賊拋棄馬畜及一切器械膽裂奔敗大將軍順承親王已札令馬爾賽會同達爾濟截殺王丹津多爾濟等亦以賊眾大敗投往推河行文

於馬爾賽且馬爾賽接閱順承親王等札後奏稱賊若來推河必緣衣克敖拉而遁今已將衣克敖拉左近之草焚燒等語如此則馬爾賽自應如前所奏率兵前往推河豫備截殺乃賊眾既至推河而馬爾賽猶逗留扎克拜達里克至十三日始出城爲追趕之狀行二三日聞有賊兵將往白格爾之語卽藉端而回夫以徒手敗走之賊不行追逐知而放去又不奏明達爾濟領兵往追情由朕以馬爾賽必有怯懦逗留明知故誤等情曾降諭旨於大臣等今據參贊胡琳參稱一聞賊來推河信息將軍達爾濟等卽整齊二標兵丁前往截殺賊眾而馬爾賽並不發兵傳報請兵殺賊至於跪求伊亦決不允許至十三日因臣等標下兵起程馬爾賽不得已同行至半路而回等語馬爾賽擁兵萬餘有心耽誤國事豈但大負朕之深恩自古以來如此背負國家者史冊中亦爲罕觀

國法軍法俱難寬宥著將馬爾賽之綏遠將軍領侍衛內大臣公以及賞給阿達哈哈番俱行革退其將軍印務著欽拜暫行署理領侍衛內大臣員缺著侯馬蘭泰補授其公爵係伊祖圖海立功所得著馬禮善承襲今已行文令馬爾賽明白具奏俟回奏時將馬爾賽正法之處另降諭旨○諭西路軍營將弁兵丁等噶爾丹策零父子兇頑世濟其惡戕害臣服我朝之蒙古部落窺伺我邊疆國家不得已用兵之苦心已屢經曉諭官弁兵丁等知之矣夫三軍司命在於將帥朕慎重其選以岳鍾琪乃將門之子久歷行閒從前用兵青海曾有勞績且於西陲情形素爲熟練伊亦自信克當此任是以命爲西路大將軍一切徵兵運餉選將設官之事凡有所請無不允行冀其殫心竭力奏績邊疆爲一勞永逸之計豈料伊秉性粗疏辦事闊略平居志大言大似有成算及至臨

時則張皇失措意見游移且賞罰不公號令不一不恤士卒不納善言自奉太豐待下鮮惠今略舉其失機一二事言之前年冬月陞見入都軍營之事全無料理以致賊人盜竊駝馬傷我弁兵嗣後朕時時降旨諭令慎密周防乃今年正月賊人越過大營直至哈密及塔爾那沁等處搶掠牲畜戕害回民伊將令不行調度無術竟令已入網羅之寇賊由坦道遁逸而去又如穆壘駐兵之舉實由岳鍾琪之奏請且稱願以全家性命保其萬全乃我兵移駐之始卽有賊人潛過穆壘河東搶擄馬匹傷害官兵見今運道牧廠時受侵擾此皆岳鍾琪失算誤國之昭著者其他顛倒昏憤疏忽錯謬之處不可枚舉以統兵之人居心行事如此無怪乎三軍之士離心解體兵氣爲之不振也朕思用兵之事關係重大似此一籌莫展屢失機宜則軍務何日能竣我三軍之士何時得以休

息用是特降諭旨將岳鍾琪調回京師以吏部尙書陝西總督查
郎阿署理大將軍事務命大學士鄂爾泰親至肅州頒賜敕書指
授方略查郎阿素性忠良赤心爲國虛懷謙受能體下情自辦理
軍需以來事事妥協邊疆情形皆所深知一到軍營與副將軍張
廣泗常賚等合志同心和衷共濟必能運籌決勝靖寇安邊是在
爾將弁兵丁等鼓舞奮興急公努力盡洗從前委靡怠惰之習合
千萬之人爲一心則忠誠感格和氣致祥必邀上天之默佑迅速
成功膺國家優隆之爵賞是此日之更換將帥酌改規模賓爾西
路軍營通塞否泰轉移之機也今年七八月閒賊兵以三萬人侵
犯北路深入厄爾得尼招地方意欲迎奪喇嘛擄掠喀爾喀蒙古
我師奮勇前追殺死賊兵萬人積屍如山河水盡赤賊夷乘夜逃
奔拋棄馬匹牛羊器械不計其數而我兵受傷者不過十餘名領

兵之大小將弁未損一員此實行閒將士合力同心仰邀天祐之明驗也今賊人既受大創於北路未必不輕視西路重整餘力以向巴爾庫爾冬春防範尤宜嚴密不可疏忽著署大將軍等將此曉諭各營將弁兵丁咸使知悉至岳鍾琪屢次失機之罪甚大律以國法不容寬貸又聞軍營弁兵無不含怨著署大將軍查郎阿徧行詢問軍營將弁兵丁等岳鍾琪自領兵以來果屬事事乖張人心共怨否抑或尚有可取之處否務使三軍之眾人人各抒己見據實舉出卽有互異不妨兩奏以聞○丙戌湖南巡撫趙宏恩奏乾州所屬寶流溪等九寨內附○丁亥 上詣怡賢親王殯所奠酒○庚寅 上以怡賢親王次日發引復親詣殯所奠酒○召尹繼善來京以魏廷珍署兩江總督性桂署漕運總督由兵部尚書署○壬辰諭辦理軍機大臣等康親王崇安母妃患病著將撫遠大將

軍印交與歸化城都統丹晉收貯崇安卽速來京○以海潮驟長沿海居民被水命督撫等加意撫綏其鹽戶鹽丁被水者發商捐義倉及嘉興倉穀賑之○癸巳諭辦理軍機大臣等朕念博爾屯之祖舊日勞績將博爾屯屢加任用伊並不黽勉向前因命往扎克拜達里克馬爾賽軍前效力乃王丹津多爾濟等在厄爾得尼招大殲賊眾之後所有被困奔逃之賊前至扎克拜達里克伊有精兵萬餘並不邀擊懦怯觀望俾其遁去博爾屯如曾勸馬爾賽而不允其罪尙輕如並未經勸過則伊之首領亦難保矣一切情節著據實回奏其參贊大臣內大臣都統俱著革去以閒散公在軍前效力行走○甲午以兆華爲盛京戶部侍郎署倉場侍郎○乙未大學士伯督巡陝甘經略軍務鄂爾泰奏北路逆賊於八月初五日在厄爾得尼招地方被我兵大敗由鄂爾昆河源向推河地方

逃去查畢濟一帶乃逆賊敗遁必由之路中間有衮他馬哈之沙磧係畢濟要隘離巴爾庫爾不過三百餘里臣隨於八月二十八日咨行護甯遠大將軍印務張廣泗令其挑選滿洲察哈爾精兵二千名交前鋒統領阿思海總統佐以副都統達什選綠營精兵一千名交總兵張存孝總統佐以副將馮廷雄即日起程前往衮他馬哈堵截並令阿思海等一到衮他馬哈卽遣弁兵哨探畢濟一帶如有賊蹤飛報張廣泗領兵追剿又令張廣泗備兵數千名遣發繼進以壯聲援得旨鄂爾泰身在肅州一聞信息卽調遣兵丁截殺賊眾斯可謂爲國之大臣達爾濟諾爾渾欽拜等擁兵萬餘駐紮扎克拜達里克遇準噶爾窮寇徒手奔逃並不迎擊待其已過虛作追趕之勢怯懦不堪將此寄與伊等知之○改湖南衡州府屬桂陽州爲直隸桂陽州管轄臨武藍山嘉禾三縣○丁酉

諭喀爾喀七旗貝勒貝子公台吉屬下人等去年朕降旨令爾等
移居內地爾等並不感悅遵行朕又屢次催促始勉強遷移此次
準噶爾賊兵前來幸王丹津多爾濟等帶領大兵將賊兵殺敗爾
等始得脫免否則爾等部落豈能保護產業牲畜朕思爾眾喀爾
喀本屬一體豈有甘居庸懦受人庇護之理嗣後各宜激烈奮發
將賊兵悉行剿滅不特永享昇平抑且垂光史冊矣勉之○張元

懷緣事革職調王紘爲浙江布政使以宋筠署江西布政使

原任右通

政○以盧焯爲河南按察使

由南汝道遷

○庚子護甯遠大將軍張廣

泗奏八月二十八日臣與署鎮安將軍卓鼐參贊顧魯暨在營鎮
將等密商將大營全撤自穆壘起程於三十日已回闊舍圖但細
閱闊舍圖地方路程叢雜氣候嚴寒兼之城堡尙未築完四處草
廠盡被賊人燒毀實亦難於久駐臣等不敢固執前議請將大兵

盡行撤回巴爾庫爾惟於附近緊要處酌量安兵駐守查得陶賴
無克克二處係賊人南來徑路各安兵一千五百名按濟察罕哈
麻爾二處係賊人西來大路各安兵一千名又鏡兒泉噶順並烏
普土克爾忒克三處在巴爾庫爾之北賊人或由沙磧或由北山
皆可前來應於鏡兒泉安兵二千名噶順安兵五百名烏普土克
爾忒克安兵一千名又圖古里克圖爾庫爾二處在巴爾庫爾之
東北乃賊人自阿濟畢濟越沙磧而來之要路應各安兵一千名
仍於一切要隘之處分安小卡倫遠行哨探另派兵丁看守牧廠
哈密塔爾那沁二處亦俱派兵防守再穆壘大兵旣撤則吐魯番
孤懸一隅所當豫籌駐兵運糧之道查吐魯番原駐兵八千名並
見留押運糧糈之兵丁五百名係分駐魯谷慶哈喇火州皮禪洋
海勒木津塞木津漢墩七處查勒木津塞木津漢墩三處俱與賊

近聲勢不能聯絡請將三處官兵速行撤回歸併魯谷慶哈喇火州皮禪洋海四處分駐並將三處回民亦俱移至魯谷慶等處城內居住庶免賊人窺伺而我兵亦易於防範報聞○丁未以彭維新爲戶部尙書

由左都御史遷

○戊申解黃文偉任以張渠爲廣東按察

使

由肇羅道遷○己酉諭辦理軍機大臣等據順承親王錫保奏傅爾

丹在烏孫珠爾地方並不整備官兵豫籌堵禦之策輒輕調兵進擊以致有誤軍機傅爾丹著革去公爵並領侍衛內大臣振武將軍○封故恆親王允祺子弘旺爲恆親王○甲寅添設江南漕標城守營把總一外委把總一漕標左右兩營把總各一外委千總把總各一

冬十月戊午諭辦理軍機大臣等今年賊眾來侵之時順承親王雖履行文馬爾賽達爾濟等令相機而行並未示以如何截殺如

何堵禦王身爲大將軍馬爾賽等乃所屬之將喀爾喀地方及賊人所行路徑王所素悉乃不爲先期指授殊屬疏忽且馬爾賽失誤軍機坐視殘寇免脫王卽應嚴加劾治直待朕降旨將馬爾賽革問始行參奏甚屬優柔觀望著行文訓飭○以吳士玉爲左都御史由吏部左侍郎遷○壬戌諭內閣領侍衛內大臣奏事之班次不宜

隨部院衙門嗣後領侍衛內大臣前鋒統領護軍統領合爲一班列於八旗奏事班次之後內務府國子監合爲一班列於都察院理藩院奏事班次之後鑾儀衛光祿寺合爲一班列於內務府國子監奏事班次之後○癸亥諭辦理軍機大臣等喀爾喀副將軍王丹津多爾濟自用兵以來實心效力去歲奮勇追殺準噶爾賊人今又在厄爾得尼招統領滿洲蒙古喀爾喀兵丁大敗賊眾斬馘萬餘挫其鋒銳賊人喪膽望風逃遁自是軍威遠震疆圉甯謐

喀爾喀扎薩克等可共享太平之福如此建立大功雖賜伊墨爾
根巴圖魯之號朕心猶爲未足向來外藩蒙古王等之子並無晉
封世子之例朕念丹津多爾濟勞績昭著用加特恩著照宗室王
等之例將伊長子多爾濟色布騰封爲世子再翁牛特貝子羅卜
藏喀爾喀扎薩克台吉齊旺俱在厄爾得尼招奮勇殺賊貝子羅
卜藏著晉封爲貝勒扎薩克台吉齊旺著晉封爲輔國公○命振
武將軍參贊都統查克旦在靖邊大將軍參贊上行走○甲子諭
內閣馬爾賽本屬庸材我 皇考聖祖仁皇帝念伊祖大學士圖
海舊日功勳望其子孫成立將馬爾賽少年襲封公爵訓誨成全
優加擢用乃伊不能仰承 聖恩致遭罷黜旋經一載我 皇考
不忍令其廢棄仍命襲封且加以格外之恩榮身兼數職無非勉
力玉成以繼名臣之後也及朕御極之初仰體 皇考優待勲臣

之盛心首先及於圖海封一等公配享 太廟兼立專祠永承禋祀又推恩及於馬爾賽念其家世不同歷官年久加恩優待賞賚駢蕃此舉朝所共知者雍正五年大學士富甯安奉差陝西滿洲之在內閣者僅有馬齊一人又因年老不能辦事而滿洲之官階資格可用爲大學士者復不得其人是以前馬爾賽備員政府以爲班聯領袖其實未能贊襄一事敷奏一言稍有補政治之萬一此亦舉朝所共知者朕初卽位時命伊兼管鑲藍旗都統伊以不能辦事力辭朕亦曲從其請蓋其苟且偷安不能出力之心朕早已知之至於伊歷來貪贓不法之案漸次敗露者朕皆暗中爲之消弭其應追之贓銀數萬兩又復降旨悉行寬免更賞世職以逮其子孫賜帑金以固其操守凡所以恩待之者遠出諸臣之上以爲馬爾賽苟有人心必無有不知感恩圖報之理去年六月間傳

爾丹統領北路大兵駐紮科布多誤被賊人所誘實功輕進至於敗北得順承親王調度運籌重加整理軍聲復振朕因傳爾丹旣已失機不可再膺元戎之寄順承親王久勞於外旣有保障之功應令暫解軍務回京休息於是將馬爾賽投爲北路大將軍畀以討賊防邊之重任伊在京承命之時卽有退縮怨望之意及領兵行走並不教訓兵丁愛惜馬力未到歸化城而馬匹已陸續倒斃於道矣行至第八臺聞賊人有侵擾科布多信息卽逡巡畏懼奏請退回駐紮相機前進乃至歸化城時又不於水草好處牧放馬匹日事遷移以致兵丁之馬傷損大半其意以爲馬力不敷便可藉口推託以遂其退避之奸志也伊在京面奏朕云爲將之道必須與士卒同甘苦乃伊到歸化城卽伐木取材蓋造煖室全忘士卒之露處竟欲久居於此爲娛老之計者且心懷怨望於眾大臣

齊集之前口稱領兵爲大將軍不如發遣黑龍江反爲安逸其但知有己而不念國家悖逆庸愚一至於此朕知其不可以爲大將軍改授綏遠將軍令其領兵赴扎克拜達里克駐紮以爲堵禦邀截之計今年七八月間賊人侵犯察罕叟爾輒敢越過杭愛深入我境搶掠喀爾喀地方是時大將軍順承親王派副將軍蒙古王丹津多爾濟額駙策凌參贊大臣塔爾岱等率領官兵尾隨賊人之後於八月初四日追至厄爾得尼招地方與賊人相遇鏖戰一日自黎明至於昏黑賊眾大敗殺賊萬餘積屍遍野河流盡赤賊人魂膽俱喪拋棄馬畜器械乘夜逃遁此次對壘仰荷上天恩佑我軍大小官員止損二人兵丁被傷者不過數十乃從來罕聞之盛事大將軍順承親王及蒙古王丹津多爾濟等卽將賊兵大敗情形並由推河潛逃之信馳報馬爾賽等令其發兵堵賊歸路軍

營將士無不踴躍奮往有滅此朝食之心而馬爾賽立意坐視按兵不舉同事之大臣等再三約會陳說馬爾賽堅執不從傅爾丹以機不可失情急至於跪求而馬爾賽始終不允且向達爾濟等差來之人云我兵不令出城夜間賊人來時我兵止在城上吶喊助威爾等兵丁若昏夜來我城下我卽施放槍礮等語似此悖逆之言聞者莫不駭異及聞賊人旣已潛逃達爾濟等又復約會進剿而馬爾賽遷延不行直至次日方領兵緩行五十餘里虛作尾追之狀又越二日行數十里託言賊已遠去追趕不及遂領兵回營此胡琳身在軍前目覩情形具摺陳奏者朕又降旨詢問軍營參贊欽拜等據欽拜博爾屯諾爾渾回奏賊人由推河等處逃遁馬蘭泰兵力單弱博爾屯願領兵前往應援馬爾賽不允嗣議截殺賊人之事諾爾渾向馬爾賽云我等應卽派兵迎截若再遲延傷

賊人全過便坐失機宜是時李杓云我等惟當固守城池而已馬爾賽惟以李杓之言爲是不聽諾爾渾等之言及至佐領札木素告稱我向扎拜克達里克來時見沿途賊人陸續經過等語馬爾賽正傳集會議間而李杓又向馬爾賽堅執守城之說諾爾渾等又再四告稱如後面尙有賊人此番經過之時決無燒荒之理視此燒荒情形卽係後面確無餘賊之明證我等急當追剿斷不可失此機會馬爾賽方領兵起程及到博木喀拉地方僅選兵七百名令欽拜前進馬爾賽竟回至扎克拜達里克等語此欽拜博爾屯諾爾渾回奏之大槩也朕又降旨詢問馬爾賽馬爾賽回奏之摺一味枝梧強爲推卸馬爾賽縱賊之罪百喙其能辭乎况欽拜等尙皆惶懼認罪而馬爾賽猶復覲顏巧辯無一愧赧之辭冀售欺於萬一則其蓄心狡獪奸險更可知矣此次賊人大敗之後狼

須不堪馬爾賽擁兵萬餘不必出奇制勝但肯遵循常理堵截賊
人之路實可使之一騎不返卽或有逃奔餘黨而我師以大隊追
襲其後必不使殘敗之寇得以漏網生還實乃奏凱成功易於完
結軍務之機會也馬爾賽身任統兵之職地當扼要之區賊過不
行堵截賊去又不尾追端坐空城視同秦越眾人苦勸之言堅執
不聽竟令入網之獸復得免脫將來餘孽跳梁一時未能翦滅伊
誰之咎似此有意阻撓軍機紊亂國事並非尋常失機之比馬爾
賽不思國家高厚之恩不念伊祖積累之舊在國爲叛臣在家爲
逆子不忠不孝莫此爲甚若馬爾賽此番情罪或爲人臣所間有
尙可念其先世之勲曲加寬貸而馬爾賽縱寇之罪豈可貸乎且
伊之負恩如此朕撫躬自思加厚恩而招怨望朕實無以自解亦
實有所不甘此皆朕乏識人之明誤用匪人朕先謝罪 宗社臣

民將馬爾賽正法以爲人臣受恩深重而心懷悖逆者之戒著詢問在京滿漢大臣九卿及北路軍營扎克拜達里克軍營將弁等令據實卽行回奏大凡微員庶民治罪之案皆屢經審訊而後定豈有馬爾賽爲國家大臣不加審訊而遽行治罪之理馬爾賽之心之罪朕知之甚悉見之甚確實無幾微可疑昔年 皇考對朕兄弟輩曾數次面諭圖海乃我朝第一良臣將來應配享 太廟皇考厚待圖海之恩誼朕無時敢忘今將馬爾賽治罪之時愈益思念及此伊旣忍悖我 皇考逆伊祖父朕執大法以理天下而於不忠不孝之人姑息寬宥遲回不決實無以對我 皇考亦負伊祖圖海之忠心矣至於李杅世受國恩不思報效居心妄誕行事乖張前在廣東將軍任內縱令所屬兵丁擁鬧巡撫公堂槍傷守備大千法紀經三法司議將李杅擬斬監候雍正六年朝審

九卿擬以情實具題原應不赦朕念其爲勳臣之裔免死釋放旋又降旨將伊補授都統仍襲伯爵此朕宥過錄用莫大之恩也去年北路派出漢軍兵丁揀選領兵大員朕因李林爲漢軍世族管兵多年諸事尙屬素諳特旨將伊派往料其感恩悔過必能黽勉自新豈知伊中懷叵測於軍機緊要之時一言僨事其罪與馬爾賽等著一併訊問具奏○禮部等衙門遵旨議奏我朝勳舊名臣屢邀異數雍正二年已敕建昭忠祠祀勤事授命諸臣勸忠之典至優且渥茲復命於京城內建立賢良祠春秋展祀其應入祠之滿漢文武大臣臣等公同詳酌如怡賢親王之精白一心忠誠體國勳在社稷澤被生民允宜首請入祠其元臣良輔如大學士公圖海公賴塔大學士張英尙書顧八代馬爾漢趙申喬河道總督靳輔齊蘇勒總督楊宗仁巡撫陳瑊等久在 聖明灼見之中入

祠崇祀於禮相符此外滿漢文武大臣或望著巖廊或名垂竹帛或操嚴冰槩或績懋封疆謹覈其事蹟參之眾論擬定大學士范文程等三十五員均應入祠崇祀得旨原任將軍阿喇納恪謹持躬忠誠奉職從前西陲用兵宣力年久收復吐魯番平定青海俱有勞績原任都統馮國相樸誠自矢從無過愆向來各旗公庫俱有虧空惟馮國相所管正藍旗全無欠缺此卽其出納謹嚴操守潔清之實證阿喇納馮國相應否入賢良祠著九卿會議具奏尋議原任將軍阿喇納都統馮國相按其實事洵屬賢良大臣允宜一體崇祀從之○乙丑諭辦理軍機大臣等吐魯番回民遷移近邊一事據副將軍張廣泗等計議明晰伊等身在軍營自有確見但不知此際有無賊人阻滯所議遷移之事曾否舉行若果於冬月遷移則天氣寒冷深可軫念雖張廣泗等奏稱塔爾那沁向有

城堡儘可令回民暫住令其耕種朕思此地並無房屋回民何以棲身查哈密地方和暖其城外五堡等處原係哈密回民居住之所若將移來之回民分派此地暫行安插過冬令額敏和卓轉飭本地回民就近照看似爲有益若哈密回民果能同心照看使之得所朕必將額敏和卓及回民等加以重賞至於吐魯番新來之回民著查郎阿等重加賞賜派委幹員加意撫綏諸凡寬裕料理務令伊等不知有遷移之苦將來若令其在塔爾那沁居住可早爲辦理物料以便及時興造房屋俾獲甯居爾等可將此寄信前去並令劉於義等知之儻冬月不卽遷移可遲至春閒再議舉行

○戊辰諭辦理軍機大臣等據將軍達爾濟奏稱撥派鄂爾多斯之三千名原屬精壯乃協理台吉策旺多爾濟與貝勒達西喇卜坦諾衣羅卜查木蘇將兵丁私行更換三千兵內五百餘名不堪

調用又逃亡四百餘名等語朕不惜國帑數千萬億極邊遠塞駐紮兵丁特欲保全喀爾喀內扎薩克之故也伊等理應各自奮勉剿殺賊人乃私換兵丁肆意遁逃此係扎薩克等從來未有之事今派侍郎納延泰選補額缺之兵將逃回官兵嚴加治罪爲首逃遁者卽著正法貝勒達西喇卜坦諾衣羅卜查木蘇協理台吉策旺多爾濟長史護衛等俱著嚴加治罪其不堪調用之兵五百名著回原游牧處所夫懲罪勸功乃國家之大典今歲八月副將軍王丹津多爾濟額駙策凌等於厄爾得尼招地方大敗賊眾喀爾喀王台吉等俱已賞給巴圖魯之號備得封典升銜恩及子孫又動庫帑二百萬兩分賞官兵給與功牌去歲喀爾喀西邊扎薩克圖汗部落數扎薩克被賊搶擄陣亡受傷人等朕施恩重賞其與賊交戰已故之一等台吉策勒克已贈爲公爵令伊子密什克襲

替至於奴僕房產衣裝等項亦盡行賞給著納延泰即將策旺多爾濟等貽誤情節告知圖爾古特貝子丹中王阿寶六旗鄂爾多斯三旗吳喇忒毛明安四子部落及遷內游牧居住喀爾喀西邊扎薩克等伊等既在一處居住與喀爾喀內扎薩克有何分別如果訓誨屬下人等不使相奪相盜接壤地方酌設卡倫有一二不肖小人犯法卽秉公懲治則其餘自不敢妄爲矣伊等誠能懷遵國法協力勦賊不過勞苦數年將來豈不各享太平之福乎公通摩克屬下人等去歲雖加恩賞但親屬被擄有欲尋求妻子者亦有己身被擄尋求妻子脫回者著交與公通摩克等務令給與妻室家產加意照看如有投來之人亦收留養贍詳詢賊信卽報知辦事官員卽中偏圖侍衛常明乃專理西界喀爾喀扎薩克等事之員如有此等人一面交扎薩克照看一面據實奏聞○己巳諭

內閣賢良祠之王大臣應各立小傳以紀生平事蹟著左都御史
吳士玉吏部右侍郎任蘭枝禮部右侍郎吳璽擬彙進呈○癸酉
景陵瑞芝生○庚辰諭辦理軍機大臣等岳鍾琪受朕深恩重
加任用西陲討賊之舉伊亦身任不辭是以用爲西路大將軍一
切徵兵運餉選將設官凡有所請無不允行實冀其殫心竭力無
隱無欺克著綏靖之績乃伊秉性粗疏辦事怠忽將國家軍旅重
務視同泛常且賞罰不公號令不一不恤士卒不納善言傲慢不
恭剛愎自用以致防禦追擊屢失機宜軍務廢弛士氣不振以多
年豫備之馬駝牲畜數十萬或被賊人偷盜或因失養損傷及至
需用之時寥寥無幾而凡陳奏於朕前者皆虛假詐僞之詞爲怙
過飾非之計其誤國負恩之罪難以悉數岳鍾琪著革職交與兵
部拘禁候朕另派大臣訊問○轉任蘭枝爲吏部左侍郎以孔毓

璞爲吏部右侍郎

由左副都御史遷

十一月丙戌諭辦理軍機大臣等甯古塔將軍常德著爲靖邊大

將軍之副將軍○癸巳以馮景夏爲左副都御史李蘭爲安徽布

政使調唐繼祖爲江西按察使以王柔爲湖北按察使

由湖南辰沅靖道遷

○乙未諭吐魯番頭目額敏和卓等吐魯番部落遠在邊境之外

去巴爾庫爾軍營尙有七八百里易爲賊人之所窺伺我師難於

庇護朕以仁愛爲心是以聽其自便不强其歸順我朝致受賊人

之侵擾也乃前歲岳鍾琪並未奏聞直以己意遣官帶領駝隻前

往採買米石致啟賊人侵擾而額敏和卓與回眾等誠心歸嚮我

朝努力奮勇抗拒賊兵上年賊眾三次圍攻回眾與官兵併力抵

禦不但全城無恙且出其不意乘間擊刺屢挫賊鋒忠勇之氣甚

屬可嘉然賊夷狡獪異常時以侵擾吐魯番爲疲敝我師之計是

以副將軍張廣泗等議將爾等搬移近邊之地以避賊人侵害前
月具奏到日朕深念爾等移徙之時賊人或於中途窺伺又恐天
氣寒冷男婦老幼苦於行役屢降諭旨令署大將軍等於途次加
意防護到時善爲安插務令人人得所此數月以來朕無時不以
爾等安土重遷縈繫於心也今閱署大將軍查郎阿等奏報回民
大小一萬餘口已於十月十四十七等日陸續起程羣情踊躍計
日可到朕心甚爲欣慰因思年來爾等屢遇強寇而未遭其戕害
今安穩遷移永居樂土世受我朝恩庇此皆爾等忠誠感格上天
顯賜福佑之明徵也除已降旨令署大將軍等悉心部署並優加
賞賚外額敏和卓著封爲扎薩克輔國公其餘頭目等有應加恩
賞授官職者俟大將軍查奏到日再降諭旨著將此通行曉諭回
民共知之○以七世同居賜湖南沅江縣生員譙衿 御書世篤

仁風額○丁酉諭內閣聞陝西甘涼沿邊一帶營伍廢弛總督劉
於義事務繁多不能親身察閱著禮部左侍郎杭奕祿來往稽查
悉心整頓給與欽差大臣關防凡有辦理事宜俱與劉於義酌行
山西近邊營伍與陝西相近者亦著杭奕祿一體稽查與山西巡
撫石麟酌行工部左侍郎署西安巡撫馬爾泰奉差西甯西安巡
撫印務著兵部尙書史貽直署理內閣學士德齡協辦其軍需事
務亦著德齡協同史貽直料理○戊戌河東總督田文鏡以久病
未痊奏請解任調理允之○己亥以孫國璽署河南巡撫阿蘭泰
辦理河東副總河事內閣侍讀學士○庚子加兩江總督尹繼善兵部尙
書銜實授喬世臣江蘇巡撫○以王士俊爲河東總督德齡爲湖
北巡撫噶世圖協理西安巡撫事兼辦西路軍需原署西○解徐
聚倫任以刁承祖爲河南布政使徐士林爲江蘇按察使由安慶府知府

遷○大學士伯督巡陝甘經略軍務鄂爾泰奏武備軍威火器最重貴速利遠火藥宜精若硝味不淡炭體不輕磺色不淨而又配合不細則氣滯不靈三軍難恃以爲勇臣經由邊郡見各標營堡施放槍礮火煙不直且半濃黑知製藥多不如法曾經嚴飭指示大略惟是揀材置料硝易而磺難硝賤而磺貴惜費省工輒以藉口陝甘兩省素稱地不產磺必赴外省採買運費工價未免浩繁肅州極邊每磺一斤價值一錢至二錢不等軍需要地接濟維艱查肅州嘉峪關金佛寺堡之所管汛地內南山隘口抵朱魯郭迤邐而西有硫磺山一座周圍四五十里徧產硫磺環山遠近並無番夷住牧若委員開採依法煎熬合算人工運費每淨磺一斤值不過五分而出產甚多用之不竭不獨便利軍需亦足接濟陝甘兩省標營需用事關邊陲武備見與劉於義面商妥員經理一面

先支銀數百兩交總兵沈力學作本開工得旨開採硫磺固於軍需有益但行之日久不無私販盜賣之弊著署督劉於義飭令總兵沈力學派兵防護實力稽查俟開採足用後奏聞請旨又奏甘涼肅爲軍需彙集之地倉儲緊要請將見行捐納款項改折本色糧石在甘涼肅等處交納得旨邊地改折米石以便積貯於軍需誠爲有益但在本地採買恐價值騰貴轉不便於軍民除甘涼肅本地民人援例者准卽以所有糧石交納外其他處捐納人等俱應由他處運交不得於甘涼肅採買著該督等通飭曉諭稽察禁止○移福建漳州府同知駐平和縣南勝地方改南靖縣車田地方歸漳浦縣轄○予故禮部尙書加太子少保銜錢以塏祭葬諡恭恪○甲辰予故太子太保河東總督田文鏡祭葬諡端肅○己酉加吏部尙書河道總督嵇曾筠太子太保○庚戌江南河道總

督嵇曾筠奏洪湖爲黃運兩河之保障高堰乃淮揚二郡之屏藩
蒙恩發帑金百萬興築石隄爲捍患計兩載告成請 御製碑文
以垂久遠從之

十二月乙卯諭內閣孫嘉淦於雍正元年尙係翰林院檢討朕看
其爲人似屬樸實屢加任用遷擢數年之閒官至侍郎竇望其殫
竭誠心爲國家宣猷效力乃伊偏執自用從前屢有陳奏皆迂闊
瑣碎不可見之施行者朕切加訓誨冀其開擴識見至近日則緘
默不言並無一事之敷陳矣伊爲國子監祭酒乃瞻顧私情將親
弟孫揚淦薦用爲監丞孫揚淦行事乖張士論不服以致孫嘉淦
聲名大損此眾所共知者國子監教習人員特爲教育人材而設
伊等分派之後有實心供職者亦有意惰廢弛者自應分別用舍
以示激勸卽稱職人員之中有通曉事體可膺牧民之寄者亦有

熟習文藝可勝司鐸之任者又當因材器使以資實用是在祭酒等秉公分晰陳奏朕前始可免冒濫名器用違其材之弊朕爲此屢降諭旨孫嘉淦身爲大臣專司成均之職甯不知之今於引見教習期滿人員時朕令舉其所知而孫嘉淦並不據實陳奏遽稱宋鎬一班六人俱屬可用及朕詳加詢問又忽稱方從仁實不堪用一時任意反覆顯係欺罔應加重懲以爲人臣詐妄負恩者之戒著將孫嘉淦革職拏交刑部究擬具奏尋議孫嘉淦懷私欺罔應照律挾詐欺公者擬斬監候秋後處決得旨孫嘉淦從寬免其治罪著在戶部銀庫效力行走○吏部議奏據兵部咨靖邊大將軍和碩順承親王錫保將陣亡大臣官員造冊送部照例錫予世職查副將軍尙書查弼納參贊內大臣馬爾薩副都統蘇圖覺羅海蘭應授拜他喇布勒哈番兼拖沙喇哈番散秩大臣一等公達

福副都統岱豪西彌賴常祿前鋒統領丁壽侍郎永國應授拜他喇布勒哈番二等侍衛德明等一百一十八員及領催委署章京之傅成格等一十六員均應授拖沙喇哈番其祭葬銀兩各按品級照例卹賞從之○庚申實授吳金內閣學士○辛酉諭內閣朕妹純愍公主在日賦性柔嘉秉心淑慎今額駙策凌又在北路建立戰功晉封親王純愍公主著追封固倫公主賜祭一壇並修理墳塋以昭恩眷○壬戌諭內閣鄂齊以閒散宗室朕加恩用爲散秩大臣及都統等官又因西藏微勞命伊襲封公爵乃怠忽因循並不實心效力雍正五年西藏阿爾布巴背叛傷害康濟鼐朕將西藏人等不合情由面問鄂齊伊視爲泛常信口奏對其在藏料理未協之處全然不知愧懼則居心之泄慢可知矣復命管理天津水師慢無約束一任兵丁擾累地方是以降旨革退公爵在待

衛內行走繼又念伊在宗室中尙爲通曉事務不忍令其放廢仍命管理副都統及護軍統領印務冀其自新以贖前愆豈料伊貪利納賂於胡五贖身案內又私得銀兩准其歸宗甚屬卑鄙無恥著將鄂齊革任交與宗人府拘禁照所得銀數十倍追出○癸亥添設湖北漢陽府同知一駐漢口鎮專司督捕該鎮及漢陽漢川二縣巡緝事宜仍兼理清軍水利等務其移駐漢口鎮之通判仍回駐漢陽府城協理孝感黃陂二縣捕務○甲子賜大學士鄂爾泰御書公忠弼亮額○諭辦理軍機大臣等額駙策凌明年回軍營時令京城操演之兵及沿途宣化大同右衛歸化城等處兵丁俱候額駙閱看○乙丑諭內閣呂留良治罪之案前經法司廷臣翰詹科道及督撫學政藩臬提鎮等合詞陳奏請照大逆之例以昭國憲朕思天下讀書之人甚多或者千萬人中尙有其人謂

呂留良之罪不至於極典者又降旨令各省學臣徧行詢問各學生監等將應否照大逆治罪之處取具該生結狀具奏其有獨抒己見者令自行具呈學臣爲之轉奏不得阻撓隱匿今據各省學臣奏稱所屬讀書生監各具結狀咸謂呂留良父子之罪罄竹難書律以大逆不道實爲至當並無一人有異詞者普天率土之公論如此則國法豈容寬貸呂留良呂葆中俱著戮屍梟示呂毅中著改斬立決其孫輩俱應卽正典刑朕以人數眾多心有不忍著從寬免死發遣甯古塔給與披甲人爲奴僮有頂替隱匿等弊一經發覺將浙省辦理此案之官員與該犯一體治罪呂留良之詩文書籍不必銷毀其財產令浙江地方官變價充本省城工之用○丙寅諭辦理軍機大臣等聞揚武將軍工部尙書武格在軍前捏造撤兵之說惑亂軍心著拏解來京嚴加訊問○實授元展成

貴州巡撫張鉞廣西布政使○以耿麟奇爲廣西按察使

由蒼梧道遷

○添設廣東惠州協興甯千總一外委把總一○丁卯以張照爲

刑部左侍郎仍兼內閣學士行走○岳爾岱患病解任調兆華爲

倉場侍郎

由盛京戶部侍郎調

○以廣東觀風整俗使光祿寺卿焦祈年爲

順天府府尹裁觀風整俗使缺○唐繼祖患病解任以張廷樞爲

江西按察使

由湖北糧道遷

○先是靖邊大將軍順承親王等遵旨議奏

馬爾賽負恩縱寇不忠不孝卽誅戮不足蔽辜臣等傳集文武官

員恭宣諭旨詳加詢問莫不異口同聲痛心切齒李杕曾犯重愆

棄瑕錄用乃復懷姦濟惡法所難寬應將馬爾賽李杕卽正典刑

以昭國憲兵部等衙門議奏馬爾賽世受國恩身邀異數爲北路

將軍手握重兵坐視賊人逃遁有心僨事貽誤軍機應將馬爾賽

梟示軍前李杕庸懦貪狡與馬爾賽姦惡相濟應一併正法得旨

馬爾賽著卽處斬免其梟示李杕著在軍前監候秋後處決至是命副都統索林奏事郎中張文彬馳驛前赴扎克拜達里克軍營將馬爾賽正法○己巳諭辦理軍機大臣等此次賊人大敗見今歸化城無備兵之事著將撫遠大將軍印信移取回京收貯康親王崇安不必前往○庚午諭辦理軍機大臣等從前署大將軍查郎阿摺奏請將吐魯番回眾在肅州所屬王子莊安插經廷臣議令總督劉於義等確勘詳查妥協辦理朕思回民等輸誠嚮化自應選給水土饒衍氣候和煦之地俾得樂業安居肅州之王子莊水泉甚少可墾之地不敷回民耕種查瓜州地土肥饒水泉滋潤氣候亦和與回民原住地方風景相似且見在開墾可種之地甚爲寬闊足資回民耕牧由塔爾那沁遷至瓜州路不甚遠可免跋涉之勞著署總督劉於義巡撫許容將吐魯番回眾卽於瓜州安

插其築堡造房給與口糧牛種等項亦行估辦交原任潼商道王全臣料理再令查郎阿卽於軍營派一武職大員先赴瓜州會同王全臣悉心妥辦回眾自塔爾那沁遷移之時著提督顏清如沿途照看至瓜州安插事畢顏清如仍回軍營辦事○諭內閣貴州提督哈元生才幹優長實心辦事伊母遽入旬訓子有素今在籍病故著賜祭一壇以示恩眷○刑部等衙門議奏逆賊嚴鴻達梟獍性成心懷叛逆與呂留良黨惡共濟誣捏妖言實覆載所難容爲王法所不貸嚴鴻達應凌遲處死已伏冥誅應戮屍梟示其祖父父子孫兄弟及伯叔父兄弟之子男十六以上皆斬立決男十五以下及嚴鴻達之母女妻妾姊妹子之妻妾俱解部給功臣之家爲奴財產入官沈在寬傳習呂留良嚴鴻達之邪說猖狂悖亂附會詆譏允宜速正典刑凌遲處死其嫡屬等均照律治罪又呂

留良案內黃補菴自稱私淑門人所作詩詞荒唐狂悖車鼎豐車鼎賁刊刻逆書往來契厚孫用克陰相援結周敬輿甘心附逆私藏禁書黃補菴應擬斬立決妻妾子女給功臣之家爲奴父母祖孫兄弟流二千里車鼎豐等俱擬斬監候又呂留良案內被惑門徒房明疇金子尙應革去生員杖一百僉妻流三千里陳祖陶沈允懷沈成之董呂音李天維費定原王立夫施子由沈斗山沈惠侯沈林友應革去教諭舉人監生生員杖一百徒三年朱霞山朱芷年從學嚴鴻達時年尙幼小張聖範朱羽采令伊等幼子從沈在寬附學訓蒙審無與沈在寬交好之處應無庸議得旨嚴鴻達著戮屍梟示其孫著發甯古塔給與披甲人爲奴沈在寬著改斬立決黃補菴已伏冥誅其嫡屬照議治罪車鼎豐車鼎賁孫用克周敬輿俱依擬應斬著監候秋後處決房明疇金子尙俱著僉妻

流三千里陳祖陶等十一人著杖實完結張聖範朱羽采朱霞山

朱芷年著釋放○眾佛保緣事革職轉納延泰爲理藩院左侍郎

以班第爲理藩院右侍郎

由內閣學士遷

○移湖北應城縣崎山鎮巡檢

駐長江埠松滋縣紅巖巡檢駐磨盤州監利縣瓦子灣巡檢駐朱

家河○癸酉以王以巽爲內閣學士

由內閣侍讀學士遷

○辦理軍機大臣

等議覆稽察黑龍江等處御史章格奏發遣黑龍江地方之覺羅

等子孫生育甚蕃並無教訓之人日流汙下且有在彼披甲者查

該處之甲特爲養贍該處之人若多爲覺羅所得則有礙於本處

人等生計若不令披甲覺羅又無以爲生且旣披甲必致與兵丁

一體驅使又恐歷年久遠覺羅等之子孫或致難以查考請嗣後

將覺羅內遣往人等有彼處身故者行文該將軍將伊妻子送回

京城交與伊伯叔等管轄教訓應如所請但覺羅原與下民不同

犯罪至於發遣必其情罪重大不可輕恕者若發遣身故又令伊妻子回京殊覺煩擾請嗣後覺羅等有應行僉妻發遣者俱免其發遣永遠拘禁於該旗高牆之內庶覺羅不肖之人知所畏懼亦無煩擾從之○福建總督郝玉麟奏臺灣北路大甲溪等社兇苗不法官兵剿平之得旨嘉獎下部議敘○復設廣東督標右營右哨二司把總一○丁丑諭八旗旗員子弟久隨外任不但伊等安逸遊蕩荒廢無成而在署干預地方之事每壞伊等父兄聲名是以從前議定外官子弟十八歲以上者悉令歸旗或讀書肄業或披甲食糧使之各有成就不至廢棄此朕教養之恩也至伊等子弟中有可以助其父兄辦理事務或別有情節不能相離者朕原准其奏聞請旨而道府以下官員不能自達於朕亦有督撫代奏之例今太原知府劉崇元將伊姪劉度昭私留任所涇陽縣縣丞

羅思哈將伊子什勤誑稱年歲未及不行咨送似此怠玩功令之員不可不加懲戒劉崇元羅思哈俱著解任送伊子姪來京該旗大臣奏聞請旨嗣後儻有不行奏聞而私留子姪在任者悉照此例並交部議處○庚辰諭理藩院額駙策凌子車布登扎布隨伊父軍前行走甚屬效力著封爲輔國公○復原任禮部左侍郎蔡世遠職銜○禮部尙書張大有卒遣禮部堂司官前往祭奠○是月免山東泰安滋陽等五十一州縣旱災額賦有差○是歲人丁戶口二千五百四十四萬二千六百六十四丁又永不加賦滋生人丁九十二萬二千一百九十一丁田地山蕩畦地八百八十一萬三千七百八十頃八十六畝有奇徵銀三千八萬九千四兩有奇米豆麥四百七十五萬二千七百四十五石有奇草五百二萬六千二百八十八束茶三十三萬二千二百九十一引行鹽五百

一十六萬二千七百八十三引徵課銀四百一萬五百六十七兩
有奇鑄錢九萬一千一十七萬一千一百二十有奇